




第九
 西塘詩鈔
 廣陵詩鈔
 後山詩鈔

九

柳田文庫
 文庫11
 D 156
 9



吳孟舉同選
自牧

文庫11
D 156
9

宋詩鈔二集

錢氏
古堂藏

宋詩鈔二集目錄

鄭俠	西塘集
王令	廣陵集
陳師道	後山集
文同	丹淵集
米黻	襄陽集
黃庭堅	山谷集
張耒	宛丘集
晁冲之	具茨集
韓駒	陵陽集
晁補之	雞肋集
鄒浩	道鄉集

宋詩鈔二集目錄

秦觀

淮海集

陳造

江湖長翁集

沈遼

雲巢集

沈邁

西谿集

沈與求

龜谿集

徐積

節孝集

陳與義

簡齋集

李覲

旰江集

王炎

雙溪集

唐庚

眉山集

孫覲

鴻慶集

張元幹

蘆川歸來集

西塘詩鈔

鄭俠字介夫福清人第進士調光州司法叅軍秩滿入
 都見安石言新法非便安石不悅使監安上門會久旱
 俠繪門上所見流民困苦圖發馬遞授銀臺進之神宗
 覽圖噓唏罷新法浹日大雨用事者爭置俠擅發馬遞
 之罪編管汀州改英州哲宗立放還除泉州錄事叅軍
 元符復送英州建中靖國放還復前職崇寧監衡山廟
 旋追毀前命勒停五年降告復將任郎叙用俠遂不復
 出在英時號大慶居士還鄉所存唯一拂故又號一拂
 居士宣和元年忽夢鐵冠道士遺之詩視之乃子瞻也
 嘆曰吾將逝矣作詩云似此平生只藉天勝如過鳥在
 雲煙如今身畔無餘物贏得虛堂一枕眠授孫而卒年



七十九嘉定中謚曰介。俠少苦學，其古詩疎朴老直。有次山東野之風，不得以當行格調律之。

謝太守答詩萊州

閑齋掩畫扉，疎竹間風韻。兀坐無所爲，仰高方苦峻。關關兩喜鵲，如以捷來獻。疑其喜過常，精爽抑何頓。謂當有嘉賓，結駟問原憲。不然親交書，萬里來問訊。何意二千石，新書爛盈卷。使者入衡門，紅光十餘仞。衣冠出蓬室，再拜望城闕。開緘列宿動，芒角相輝煥。捧讀未終篇，欽降已三歎。譬如涉春波，渺不知涯岸。又若驚雷霆，但覺目眩轉。誰言匹夫窮陋巷，一簞飯篋有無價。珍貴于青玉案，昨者鄙俚辭。惟求指瑕豐，敢期明月珠。傾寫殊不恪，重重借褒譽。許與良過分，酷愛愚且直。還憐貧且困，惟人最難知。聖哲其

猶恨自非明如日，安得物無遁。程孔昔中途，邂逅適所願。傾蓋畢所懷，日西不知倦。聖賢欣道合，萬古直一瞬。淒涼千載餘，此道誰復振。未聞似今日，曾不拜公面。顧遇過所親，思知久彌浚。重念樗散材，平生慕忠順。青衫百僚末，言責固所遠。若其愛君心，豈以爵祿辨。謂宜爲民上，必與同喜慍。謂宜食君祿，寧當復私狗。刀斧且滿前，斯誠豈磨磷。千載幸一時，岩廊拱堯舜。夔臯豈無人，共鯨偶未窟。眷委一失真，聰明不無亂。出令以便民，動皆爲深患。疲羸死飢凍，重負遭囚絆。奔逃苟自活，父子潛分散。以天征不義，如以雨蘇旱。簞食迎王師，東征西怨未聞百萬師。戈鋌日持玩，南取十數洞。西開五六郡，府庫爲一空。白骨成龍斷，大臣弄權柄。生殺在顧盼，威福不有歸。佞邪尚何憚，公忠

獲罪咎。正直招訶譏。幽志鬱不伸。變異以頻見。陰陽爲之
珍。淫潦仍乾曠。方且頌太平。長歌事賡贊。天子九重門。深
居拱間燕。人人懷欺匿。比周相引荐。以俠觀此時。網維一
何紊。滔滔恐皆溺。心竊擬手援。是以屢上章。指陳幾欲遍。
初雖蒙嘉納。終不離讒間。棄逐來窮陬。星霜兩經閏。簪紳
滿朝著。大半嗟排擯。誰爲憫窮褐。粟帛推餘羨。誰爲念孤
獨。齒牙借餘論。重傷棄逐久。不敢畧自辯。高堂有單親。日
久庭闈戀。同時得罪人。一赦皆從便。惟茲尚遠斥。不許歸
寧覲。擬扣閭闔門。明颺紫宸殿。恨無可言路。勇決固所斷。
嗟嗟道云亡。丈夫兒女懦。勢利同險巖。風雲借餘便。誰非
顧金錢。誰非息達宦。孳孳顧理義。惻惻念寒酸。如公今幾
人。百世紹休聞。

觀孔義甫與謝致仕詩有感

人生足清閑。天下第一福。惜哉聲與利。舉世方逐逐。君子
耀軒裳。小人腴口腹。霜雪滿頤頰。馳競心更速。誰如東山
後。清風千載續。仁孝實天成。聰明乃幾燭。弱冠揖高科。聲
華光煜煜。騏驥駕夷途。千里在舉足。歲未再周天。官先上
應宿。皇華屢更指。間請分符竹。端介奉高明。慈仁撫熒獨。
施設妙通神。歡謳道相屬。一旦遽上章。幡然謝羈束。古人
泄官政。五十日艾服。公年未五十。懇請竟從欲。緬彼伋與
軻。進退遺佳躅。三揖就恩榮。一辭託巖谷。由公仕以觀。其
庶無愧恧。東臯我田園。負郭予室屋。兒姪幾百人。圖史逾
千軸。親舊旣周旋。閨門更雍穆。賓來酒一樽。興來碁一局。
吟嘯動煙雲。詩書到僮僕。寧知地有仙。但見人如玉。乃覺

世間人爲生何局促。譬如方汚垢。對之獨薰沐。孔公當代賢。宜其欽愛酷。慷慨出長篇。情殷語重複。日日動歸息。浩浩見林麓。何意蒙鄙人。幸茲一觀矚。當筵頓忘味。如聽簫韶曲。平生粗意氣。自初得書讀。每見古聖賢。心常自程督。知身是罪根。每每自鉏斫。如彼善稼穡。去草茂嘉穀。深嘉遠世網。有若囚脫桎。惟茲素艱貧。事與心反覆。歷官二紀。周一紀。投南隩。歸時異去時。聖主恩霖霖。方欣到家鄉。足覺愁慮簇。高堂皓垂白。甘旨不饒沃。四弟兩背亡。未言他骨肉。繼又喪一弟。三房等窮蹙。不數姆與婢。孤孀十有六。薄業支半年。一飯猶五菽。蕭然夏秋際。甚者日食粥。人惟有父子。恩親家室睦。惟知有君臣。禮義朝廷肅。二者苟有違。三靈共誅戮。况茲生聖辰。熙隆遇堯學。艱虞免兵革。少

小遊庠塾。青春被恩擢。名姓粗揚暴。孰非累聖德。師誨而君牧。中間更狂妄。天聽常纏續。云云不少已。竟致御史鞫。所負鼎鑊輕。敢意尚收錄。日月忽中天。湛恩我濯浴。父子實再逢。君臣亦敦復。新恩胡爲報。舊過云何贖。父母教子勤。羽括而礪鏃。朝夕望乃成。榮顯被親屬。慈烏於反哺。知以報生鞠。學術不寸施。猶之玉韞匱。千載邁明良。不能少負輻。是生天地間。曾不如草木。以此望明公。雲中一鴻鵠。

臘月十八日呈子京

歲去如奔馬。殘日十有三。姪爲當嫁女。甥是未婚男。叢然猥俗併。殊非力所堪。嗟予本支離。塵事素不參。東林書一架。西榻經一函。如是歲月深。吻舌如滕緘。惟有陶淵明。常欲其清談。牀頭酒盈壺。亦欲同醺酣。二十一二間。煩事如

掃芟期使堂下空。宴笑同所耽。清樽酌宜深。古語交蘄若。
夜久燈熒熒。金波忽東南。歲宴獨優游。庶幾爲不凡。

示潮州吳宅三甥

大郎性純淑。至寶受磨琢。二郎姿秀美。白璧光閃爍。三郎
神照藏。宛若雛在殼。五彩翔鳳翰。參差見斑駁。三人吾令
甥。亦嘗從吾學。吳穹有顯通。報應無舛錯。未有祖慶厚。而
招子孫薄。二親又善教。曾不閑飲啄。甥雖多似舅。三子自
超卓。爲文要根理。覽古務詳博。不惟子三人。萬世同矩矱。
慎勿學舅癡。直指世好惡。心雖在規益。世誰受忠謬。立身
旣不危。青雲在挈攬。

示女子

吾生鮮兒女。汝次今居首。柔惠少語言。天性非矯揉。女生
必有適。二親非終守。旣嫁又他州。安能長相就。幸然汝夫
賢。純淑真汝偶。出門天其夫。禮律其來久。汝姑吾之妹。姑
夫爲汝舅。事舅如事父。事姑如事母。三者無所闕。汝則無
大咎。門內有尊親。門外有親友。歲時或餽助。祭祀合奔走。
一一無間言。乃可逃父醜。治家在勤儉。臨財戒多取。誦經
味其理。聖心良可究。卽事念慈和。無但勞吻味。善看育與
蟾。二子吾珠錙。汝嫁旣違鄉。吾遷又遠趨。東去十八程。西
來二十九。三四千里間。吾視堂猶牖。人生否與泰。正若夜
隨晝。但當道無虧。不媿載與覆。憶昨汝初生。時吾心有負。
以爲臣事君。卽是子事父。閨門有危難。誰不在惇疚。推其
愛父心。誰不得前剖。幸爲男兒身。許國自結綬。安能冷眼
看。終不一開口。封章重寸上。夫豈避鼎釜。南州雖譴逐。萬

死蒙恩宥。行行出國門。母馬吾徒步。汝生未三月。正當時。襍乳雪片落鵝毛。霜簷懸凍溜。汝母斂汝身。寒風裂雙肘。驅馳僅逾時。粗糲不敢吐。殘春到貶所。歲卯俄及丑。汝時年十二。稍稍近針縷。是歲真龍躍。重明登九五。湛恩被遐荒。漸漬到枯朽。拜命走親庭。便道從海浦。既見汝姑賢。汝乃吳氏婦。我乃緣他人。謹斥循其舊。人皆念再逐。道路或攢皺。我以臣子心。等視如榮授。人生無患難。憤勵亦何有。况茲尋前道。復見迎賢堦。旬月得相聚。天與幸誠厚。君命不可緩。病巴斯馳驟。南北出靡常。惟祈各寧壽。舉足念其身。行幽如白晝。又當夙夜間。警戒其君子。神靈依正直。惟仁孝是祐。書信或往來。知汝無病苦。爲婦泊爲母。皆不處人後。定當舉家歡。相慶酌大斗。勝彼淚滂沱。臨期一盃缶。

六環助潮士鍾平仲納官輒辭贈以詩

揭陽繁富州。鍾子處城閭。怡然保清操。不與世俗換。豪家富廩庾。鼠雀嫌陳爛。鍾子無田園。斗糴供哺旦。甲第闢公門。奴僮立如雁。鍾子無使令。其子供饋盥。無妻備組紉。無婢奉炊爨。市屋十數椽。厘商是隣畔。暝陰滋蠹蝕。飛屑落八案。炎蒸鬱不通。揮扇尚流汗。絃誦不輟音。學海窮瀾漫。文章有星斗。胸臆藏璀璨。何殊盛衣冠。而坐於塗炭。下藥百十包。虫腐皆逾半。經年無人顧。蛛網潛滋蔓。苦李十數株。採摘亦素幹。此外乃一無。兒女不蔽翫。固非人所堪。隨分亦侃侃。何意官物租。添輸告踰貫。太守爲學校。芹苳思樂津。買田垂萬年。供給期無岸。誰人不樂輸。我獨無計辦。此時私愁憂。幾至方寸亂。我身困長途。脫身自投窟。聞此

心惻然。不覺潛浩歎。六環聊助君。驚股難廣獻。聊欲分子
憂。使免頰勾喚。知子謂子貧。不知謂矜慢。斯則朋遊愆。此
時那可斷。子猶重辭讓。揖拜如戰汗。急取慎勿辭。六環如
六萬。

再到吳子野歲寒堂

再到歲寒堂。仍登歲寒閣。閣上與堂前。物物皆如昨。鉄幹
偃虬龍。雲峰自巖窟。文章有神力。璧筭光彩錯。主人歲寒
翁。古意何淡薄。山肴具樽酒。忻喜爲我酌。高論寫胞懷。千
弩射鯨鱷。速悟有寶龜。靈通非火灼。辯議恣酬答。亦以資
笑謔。想翁賓去後。前宿徐徐鑰。萬卷羅目前。舒卷良自若。
盛暑一榻風。初寒一爐藥。偷然去與來。一箇無住着。我亦
淡泊人。世味聊咀嚼。無種不取嘗。畢竟何美惡。但聞歲寒
風。便覺世齷齪。今茲翁如龍。看彼皆尺蠖。今茲翁如鴻。視
彼皆籠縛。故願歲寒翁。高收歲寒脚。踞坐百千年。看春華
秋落。無令木石心。長笑人脆弱。

古交行

大海有時竭。此心瀝不乾。厚地有時坼。此心無裂文。持此
以相照。百鍊青銅昏。用此以相惠。貝璧黃金盤。靚面有餘
歡。背面無間言。德義以相高。慶譽以相先。千古似一日。萬
里如同筵。此爲金石交。誰與知者論。

教子孫讀書

水在盤盂中。可以鑑毛髮。盤盂若動搖。星日亦不察。鏡在
臺架上。可以照顏面。臺架若動搖。眉目不可辨。精神在人
身。水鏡爲擬倫。身定則神凝。明于烏兔輪。是以學道者。要

先安其身坐欲安如山行若畏動塵目不妄動視目不妄
談論儼然望而畏暴慢不得親淡然虛而一志慮則不分
眼見口卽誦耳識潛自聞神焉默省記如口味甘珍一遍
勝十遍不令人艱辛

賦公悅席上事送周如京

逢世路分疑歸洛陽有客邂逅樵溪曲高談傾蓋萬珠璣
相對崇朝惟不足武陽太守山蘭徒喜賢樂事天下無爲
客留公駐斯須精庖饌玉歌貫珠坐中賓客皆豪傑凜凜
清風生頰舌性情浩浩談云云不待酒味旣凜冽逡巡行
幕如風翻二姝新出屏幃間一人捧心餘故態對客悄悄
眉峰攢一人檐裾半雲霧仙袂應曲飄飄舉解作陽關意
外聲舊人只把花卿數此宵嘉會世所稀席上更覽周侯
詩彫金有格但聞說不覽新集那得知俠于周侯非甚舊
朋友十輩識公九此公惜別事如何反覆清篇還執手龍
韜虎畧何處藏却向吟筆呈鋒鏑堪作太平祥瑞錄將軍
白首弄篇章

謝太守惠酒

重陰未宥避陽明飄風驟雨加震凌正月已缺二月近滴
水成凍威稜稜帝雖乘震利發生令猶行冬重嚴凝鬣皆
遷喬忽入谷魚已弄煖翻藏冰此時草木亦成愁祇恐不
得達其萌吁嗟羈窮影弔形安得恣然如無情明良會合
千載遇乃以罪棄投荒荆單親萬里頭應雪不得朝晚奉
甘馨閩嶺之南方弄兵殺氣殊與生成爭旣不能輔助聖
時使咸若又不得慷慨帝前效昔人之請纓詩書滿腹浪

自飽一句不得推而行。身雖兀坐心惕驚。愁緒忽起填胷
膺。但聽曠野深林調調刀。如有神號鬼泣聲。真江太守
真慈明。惠施每每先單筴。眼前突兀雙玉瓶。滿貯玉液清
冷冷。拜公之賜未敢傾。不覺失笑三閭生。不學憔悴思獨
醒。哺糟啜醢隨其朋。往往一飲一石五斗解。醒被人呼作
生。劉伶雖然遇酒而酩酊。心不汝醉神亦寧。開樽又飲太
守德。和氣坐覺生簷楹。不知凝冽自何去。至于愁思皆自
澄。乃知春功亦不遠。緘封祇在瓶與罌。安得遽爾披重雲。
劃見白日臨青冥。和氣習習扇九壤。枯枝朽質爭敷榮。風
雨時泰階平。聖君萬壽寰海清。細草輕煙日邊路。鳳管龍
絲細可聽。有耳不聞聲與鉦。有目不識旗與旌。聖功浩蕩
不可名。

醉翁行贈黎師醇

金峰醉翁七十九。行步龍鍾面鰲垢。惟有滿腹奇文章。日
月爭新無老醜。頰舌鏘洋言不苟。咳唾成珠須信存。兩眼
如星照耀人。見客偏明儼如舊。問翁壯年愛碁酒。邇日還
如昔時否。曰予不戰猶好看。日飲常能傾一斗。因持碁酒
前就翁。明日壺漿復予就。朱君貧苦亦好奇。接續攜持窮
清晝。城中遑遑競趨走。覲面草草忘親友。幾入樽俎暫從
容。笑傲松篁弄花柳。寧知此郭予三人。繼日相從辰到酉。
龐眉皓髮常溫然。相見妙齡眉目秀。惜哉才高命蹇成遺
滯。四十餘年州縣吏。棄之林野混漁樵。徒使知音動嗟喟。
愚聞天道高遠不容人。測度無奈人能樂其樂。故有鼓琴
重圍行歌遺穢。浩然克塞不以世俗瑣屑累寥廓。愚觀翁

之子孫說說繩繩。此其後慶爲不薄。世俗母以翁老生輕心。須知此翁頭白面黧而英心義氣。天地不得而銷鑠。

連州斛嶺寨井

斛嶺寨行雲際。下視長江入地底。汲江登嶺行三里。躋攀峻險爲艱爾。將率居民幾半千。度歲終年苦無水。爰自慶曆達元符。循舊安常誰擬議。元符太守何公賢。愛民慮事誠而至。以爲山頂流泉鮮其事。吾觀古人行師動萬億。所至豈必皆平地。軍必有井井未達。將渴不敢聞衆耳。陰陽者流以水照星。星之所聚泉所委。行行浚鑿三日遇泉井成矣。乃今三井如鼎趾。豈特當年負瓶操綆僕僕往還之人爲慰喜。吾欲後之人知井所以起。敬守前功無委地。必使甃砌長如今日之清泚。萬萬斯年施何已。故作此歌勸

諸斛嶺之市

苞苴行

苞苴來苞苴去。封書裹信不得住。君不見箕山之下有仁人。室無杯噐以手捧水。不願風瓢挂高樹。

瑞像閣同楊驥雪夜飲酒

濃雪暴寒齋。寒齋豈怕哉。書隨更漏盡。春逐酒甌開。一酌留孔孟。再酌招賜回。酌酌入詩句。同上玉樓臺。

和荆公何處難忘酒詩

何處難緘口。熙寧政失中。四方三面戰。十室九家空。見佞眸如水。聞忠耳似聾。君門深萬里。安得此言通。

次張子京遊天王湖作

湖上遲遲不忍還。談玄清徹幾重關。旋嵐野馬皆歸靜。逝

鳥潛魚各自閒。墜果露巢秋後。樹淡煙斜日晚。來山吟情到此何終極。注目紅雲紫霧間。

同子忠上西樓

偶因送客上西樓。其愛佳城枕海陬。雁翅人家千巷陌。犬牙商泊數汀洲。風吹細雨兼秋淨。雲漏疎星帶水流。獨有單親頭早白。迢迢東望不勝愁。

次孟堅初冬晴和見梨桃二花作

十月南天尚暑襟。幽花何怪動清吟。半扉素蓋呈修徑。幾朶天紅出茂林。地借小春回暖氣。日勻疎影轉輕陰。惟應幕府多才俊。不負行臺醉賞心。

幽居

蕭條深巷寄門墻。城郭村居事異常。石展地衣三藥徑。錦圍天柱十花檣。幽禽隔樹鈞膠語。異草搖風合和香。不覺冬歸與春到。但知無事日偏長。

煙雨樓

仙人居處卽鼇宮。更作層樓峭倚空。羣岫西來煙漠漠。大江南去雨濛濛。花鑣柳策熙怡裏。耘笠漁蓑笑語中。別有夜楹千里月。凭欄清興與誰同。

示潮州妹子

八人兄弟三人在。獨立他州信汝賢。直使無情如槁木。忍看垂淚念南遷。從今依舊歌泉水。何物偏宜寄謫仙。美酒年年須百甕。好從南海便乘船。

和子京霜字見寄

秋深園圃雖無雨。晚歲頭鬚自有霜。身事無功且人事。酒

囊餘地乃書囊。寒鴉嘯侶鳴喬木。粉蝶成圍過矮牆。對此
每思良友伴。幸時來訪浣愁腸。

次韻知郡登高言懷

莫向天涯說故鄉。人身不似雁隨陽。黃花滿手空佳節。千
里有懷如寸腸。爲許功名酬聖代。不須愁緒付瑤觴。男兒
不是閨中物。生則彘弧射四方。

次韻張老見贈

烏鴟螻蟻有君臣。此義如何易世塵。欲爲無窮宗社計。宜
憂如幻灰生身。八千江上奔馳路。十二天南黯澹春。歸到
親闈捧杯酒。始知終是福唐人。

觀碁

三百六十路通精。此有門數奇藏。日月機發動乾坤對面
知爲敵。渾輸却有翻詐貪。常易喪仁守。乃長存。隻子如輕
用全功。更莫論。就令投險勝。寧抵被圍奔。縱得四方盡。寧
同一腹尊。傍觀饒好着。當局奈填言。慙媿中孚信。幾危大
壯藩。坐觀成敗者。安得不驚魂。

出御史臺

萬險千艱六出身。如今也得避囂塵。須知從此寒原上有
箇行歌拾穗人。

道中見以索牽五六十人監理錢者

可憐平地不生錢。稚老累累被索連。困苦新圖誰畫此。抵
愁中禁又無眠。

廣陵詩鈔

十九

王令字逢原廣陵人也年十數歲與里人滿執中為友
 偉節高行特立于時王安石赴召道由淮南令賦南山
 之田詩往見之安石大喜期其材可與其功業于天下
 因妻以其夫人之女弟年二十八而卒令詩學韓孟而
 識度高安石所及不第以瓌奇也惜限於年耳

寒林石屏

號山之遠數千里號石之重難將持舟車號來每苦重
 益尚棄不肖攜苟非世尚且奇怪孰有甚遠載以來何况
 號人自珍秘得一不換千瓊瑰流傳中州盛稱尚主以詫
 客客見祈世人賤真珍貴假見者喜色留膚皮強材美幹
 立修蔭羅列滿野誰復窺我嘗客坐例一見實亦可愛小

且奇。初疑秋波瑩明淨。魚子變怪成蛟螭。鱗鬚爪角尚小碎。但見蜿蜒相參差。又如開張一尺素。醉筆倒畫胡髯髭。如何石上非自然。猶是軟弱從風枝。高樓曉憑秋色老。煙容雨氣相蒙垂。喬林隱約出天際。醉目遠矚分茫微。不然誰家老圖畫。破碎偶此一片遺。借令人手弄點畫。尚恐巧拙成瑕疵。如何石理自生長。安得當世無猜疑。高堆黃金募辨說。萬口利銳如磨錐。或云南山產巨怪。意欲手把乾坤移。先偷日月送巖底。次取草木陰栽培。天公怒恐寢成就。六丁挑斧摩雲揮。世人乘此得分裂。鍛琢片段賡財資。至今風雨號山夜。樹石號作神鬼悲。又云春氣入山骨。欲自石裏生蒿藜。根株芽栴未及出。卒遇匠手相鑿隳。多稱老松已變石。此固剪截根鬚離。又云鬼手亦能畫。多向石

室成屏帷。固知物怪浩難盡。誰能向此明是非。城狐老能男女變。海蜃口或樓臺吹。世間自是有此類。何必詰曲窮所歸。細思此屏竟無用。石不中磧木莫一作不支。徒將文理有小異。招聚瞽說成籠欺。咄哉閉口不復論。為語愛者無我譏。

贈慎東美伯筠

世網掛士如蛛絲。大不及取小綴之。宜乎侗儻不低斂。醉脚倒踏青雲歸。前日才能始誰播。一口驚張萬誇和。雷公訴帝喘似吹。一作乞盛恐聲名塞天破。文章喜以怪自娛。不肖裁縮要有餘。多為峭句不姿媚。天骨老硬無皮膚。人傳書染莫對當。破卵驚出鸞鳳翔。間或老筆不肖屈。鐵索縛急蛟龍僵。少年倚氣狂不羈。虎脅插翼赤日飛。欲將獨

立跨萬世笑謂李白為癡一作兒四天無壁纔可家醉膽
憤癢遣酒拏欲偷北斗酌竭海力拔太華塵鯨牙世儒口
軟聲如蠅好于壯士為忌憎我獨久仰願得見浩歌不敢
兒女聲

寄題韓丞相定州閱古堂

始聞定作閱古堂又聞定有閱古詩揚之遠定五千里思
得兩翅擘以飛偶聞人來說堂事初敞兩壁無塵疵間時
公來命繪匠親以玉指交畫擗教令某載若某狀匠拜奉
命唯不辭左圖守相父母吏右狀將帥熊罷姿長冠我我
偉笏佩鬪以玄白為裳衣屹如丁寧立以議遜若避讓行
而隨圖成嚴毅色可讐過吏不敢竊目窺仍令大筆署行
事寫出黑膽朱肝脾死者有靈如不泯合有英氣來附茲

故公之謀不知出宜有神鬼一作陰助奇茫茫九泉謂已
朽豈意一旦存形儀請留中壁素莫繪待千歲後公以歸
當搜國匠第一手狀寫公像存依稀要知文完武純備遺
與萬世瞻思資我知觀者足墮淚不復覘首羊公碑又聞
當世大手筆磊砢詩句相撐支手搏蛟龍拔獬角爪擘虎
豹全脫皮鄆州溪堂遂寂寞韓詩塵蔽人不吹想應從此
傳萬世粹玉貫串珠縈繫小戎何為尚縮伏久滯公斧血
不滋何時功成事業就兩手一掃清三丞一作歸來天子
喜以頷泰階輝煥平無欹次招當世草茅士各使呈露心
腹披締裾聯纓上廊廟留與後世圖為師然後回謝闔古
堂彼合異代今一時

龍興雙樹

春城花草窮朱殷。俗兒趁走脚欲穿。閑來無惊喜自適。時到雙樹爲奇觀。莊如天官植幢蓋。毅若壯士蒼衣冠。老枝叉牙忽並出。似欲併力擎青天。靈根深盤不可究。疑與地軸相拘攣。不知培栽竟誰手。而又始植爲何年。行捫步遶不可問。但見茂色連雲煙。東風牽人少游此。佛屋日日重門關。雖有大蔭人不及。于此尤得志士憐。束蒿爲楹樗爲柱。居者略不憂其顛。廼令遺材抱美植。不得總載桷與椽。高堂傾欹未支柱。匠者日亦經其邊。不思大幹有強用。反以斧鈍難其堅。吁哉誰是愛材者。定知惜此雙樹篇。

原蝗

蝗生於滿一作野誰所爲。秋一母死遺百兒。埋藏地下不腐。暇疑有鬼黨相收。一作持寒禽冬饑啄地食。拾掇穀種無

餘遺。吻雖掠卵不加破。意似留與人爲饑。去年冬溫臘雪少。土脈不凍無冰斯。春氣蒸炊出地面。戢戢密若在釜糜。老農頑愚不識事。小不撲滅大莫追。遂令相聚成氣勢。來若大水無垠涯。蓬蒿滿眼幸無用。爾縱嚼盡誰爾譏。而何存留不咀嚼。反向禾黍加傷夷。鴟鵂啄銜各取飽。充實腸腹如撐支。兒童跳躍仰面笑。却愛甚密嫌疎稀。吾思萬物造作始。一一盡可天理推。四其行蹄翼。不假上既載。一作角齒乃虧夫。何此獨出羣類。旣使跳躍仍令飛。麒麟千載或。一作始一見仁足不忍踏。草萎鳳凰偶出。卽爲瑞。亦曰竹食梧桐棲。彼何甚少。此何衆。况又口腹害不訾。遂令思慮不可及。萬目仰面號天私。天公被誣莫自辨。慘慘白日陰無輝。而余昏狂不自度。欲盡物理窮毫絲。要祛衆惑運獨

見中夜力為窮所思始知在人不在天譬之蚤虱生裳衣
捫搜撥擬要歸盡是豈人者尚好之然而身常不絕種豈
此垢舊招致斯魚枯生蟲肉腐蠹理有常爾夫何疑誰為
憂國太息者應喜我有原蝗詩

題滿氏申申亭

申申亭者名自誰河東丈人身銘一作名之方其作亭自休
息固欲申暢名其題雖然自奉頗優樂豈敢兼忽當世為
若曰所憂非所及因以遜世無悶辭丈人疎高喜自適去
不限約來無時門無賓僚車馬絕室有几杖衣冠一作巾欵
夜徑行招海月伴晝榻坐與天雲期春林暄和鳥聲好勝
聽俗論相啞一作啞塵埃縱爾得風力卒不到此徒自飛
亭前朱朱有冶態亭下白白無俗姿好木留存竟見實惡

草鋤拔無容茨嘗聞景勝未易敵須有大句相參差故吾
經年不敢往日望詩老力可支偶來為游適已晚花稍尚
有春餘遺高哦遶樹惜時節拾嚼紅片行透遲回看北林
竹萬箇寒氣一作翠欲起凌人威清風時來助氣勢塞甲夜
聚言語私方將投閑日來此脚踏樹下成交蹊無端塵土
又為隔明日跨馬西北馳心思夢好定頻到不必直俟歸
風吹

聞太學議

白日流上天牛蝨無遁形萬目盡為用而不駭日明穴鼠
夜值螢嗾嗾相聚驚鼠穴不日通鼠足不日行已矣不日
識迺此螢燭矜鱗蝦陷井坎莫與江海爭籬禽不天飛詎
識雲漢冥咄哉浮薄兒勉為高大營

贈別晏成績懋父太祝

懋甫相門兒。家世香纓統。早年綴官簿。青衫蔚於莢。本宜
 多騎矜。不謂銳義敢。意貪英雄交。一手欲四攬。偶來濫予
 會。臂搦首已領。酒罈誇胸襟。頂踵都一膽。壯心羞摧藏。義
 肉喜菹醢。要言相死從。一作處顧豈苟難斬。聽其自陳論。
 峭拔不平漸。要之當一切。固合不黜黯。一作憶余少年時。
 亦自喜黜濶。于今老而悔。壯意日凋減。惜夫相遇遲。君放
 我已檢。驟聞強大語。若虎餓得啗。已無相高心。徒有志氣
 感。春風吹天昏。醉目睨愁黦。念當相別去。兩懷不無慄。何
 時重來過。慰我涸轍噉。惟其命去後。猶一飽復歎。幸因西
 南風。時作寄我藪。

夢蝗

至和改元之一年。有蝗不知自何來。朝飛蔽天不見日。若
 以萬布篩。塵灰暮行嚙。地赤千頃積。積疊數尺交。相埋樹皮
 竹。顛盡剝結。况又草穀之根芟。一蝗百兒月再孕。漸恐高
 厚塞九垓。嘉禾美草不敢惜。却恐壓地陷入海。萬生未死
 饑餓間。支骸遂轉蛟龍醢。羣農聚哭天。血滴地爛皮蒼蒼。
 冥冥遠復遠。天聞不聞不可知。我時為之悲。墮淚注兩目。
 發為疾蝗詩。憤掃百筆禿。一吟青天白日昏。兩誦九原萬
 鬼哭。私心直冀天耳聞。半夜起立三千讀。上天未聞間。忽
 作遇蝗夢。夢蝗千萬來。我前口似嚙。嚙色似冤。初時吻角
 猶唧啖。終遂大論如人然。問我子何愚。乃有疾我詩。我爾
 各生不相預。子何詩我盡。陳之我時憤。且驚噪舌生條枝。
 謂此腐穢餘。敢來為人譏。爾雖庶黨多。我謀久已就。方將

訴天公借我巨靈手盡拔東南竹栢松屈鐵纏縛都為箒
掃爾納海壓以山使爾萬唯同一朽尚敢託人言議我詩
可否羣蝗顧我嗟不謂相望多我欲為子言幸子未易啜
我雖身為蝗心頗通爾人爾人相招呼飲啜為主賓賓飲
啜嚼百豆爵主不加詬翻歡欣此竟果有否子盍來我陳
子應之曰然此固人間禮儀介迎召來飲食固可喜蝗曰
子言然子食何愧哉我豈能自生人自召我來啜食借使
我過甚從而加詬爾亦乖嘗聞爾人中貴賤等第殊雍雍
材能官雅雅仁義儒脫剥虎豹皮假借堯舜趨齒牙隱針
錐腹腸包蟲蛆開口有福威願指轉賞誅四海應呼吸千
里隨卷舒割剥赤子身飲血肥皮膚噬啖善人黨嚼口不
宜吐連牀列筴筮別屋閑嬪姝一身萬椽家一口千倉儲

兒童襲公卿奴婢聯簪裾犬豕羨膏粱馬鹿餘繡塗其次

爾人間兵阜倡優徒一作兵倡子不父而父妻不夫而夫

臣不君爾事民不家爾居目不識牛桑手不親犁鋤平時

不把兵皮革包矛及開口坐待食萬廩傾所須家世不藏

機繪繡繇一作繡衣襦高堂傾美酒鬻肉鱸百魚良材琢

梓楠重屋擎空虛貧者無室廬父子一席居賤者餓無食

妻子相對吁貴賤雖云異其類同一初此固人食人爾責

反捨且我類蝗自名所食况有餘吳饑可食越齊饑食魯

邾吾害尚可逃爾害死不除而作疾我詩子言得無迂

寄滿執中子權

吾愛子權詩苦嚼味不盡窮思欲名狀百比無一近初如
貪追兵屢請忽許進旗旄交叉幢戟劔後先刃方爭奮拏

先忽觀斬亂狗。徐驅得平郊。萬甲合一陣。偏裨走起頗。中
堅坐吳牘。喊呀鬪志酬。髮髯窮敵刃。前軍奔交兵。後馬走
斷紉。須臾聲金休。萬噪快一雉。羣降挑戈矛。叩拜乞用纛。
蒼黃請命間。竊視不敢瞬。玄雲壓空虛。半夜暴震震。睡耳
起欲掩。驚仆失肝腎。壯者固已然。况余乃齟齬。及其久詳
味。欲吐復自悵。有如羅百珍。次第嚼嚼順。貪豐不辭多。愛
美忘餘餒。故其留人口。雖久咽喉潤。何時匹馬來。一作畏
愛氣兩振。唯其未合間。如不獲謝蘭。望風爲此詩。顛倒猶
合燼。

再寄滿子權二首

秋近啼哀蟲。君思云奈何。我愚得君思。合少君賢勞。我心
則多非。獨辭源長。瀉海爲江河。平生未始有點缺。玉日拂

拭金燒磨。尋常貍與狸。見一足已蹉。又况一地附三虎。狗
彘雖勇何敢過。揚州我何思。青山無一螺。午市不畜寶。米
鹽纔如宅。而吾三夫子。一身各丘軻。瓊林自生寒。結霧成
冰柯。文章日組緯。玉機飛金梭。誰有真珠繩。結何張麟羅。
拔爲當世祥。聲爲太廟歌。我願參衆民。手足搖婆娑。
有錢莫買金。多買江東紙。江東紙白如春雲。獨君詩筆宜
相親。綴聯卷大十牛腹。要盡寄我無寄人。我將攜之東。一作
海去 脚踏海水洗齒脣。轉來清澈飲百斛。蕩滌腸肺無
纖塵。嘗聞泰山高。高處天爲鄰。借如無梯不得上。亦欲大
叫呼天神。鋪陳君所詩。譟口雷鼓振。世多俗耳。既莫告。當
冀上帝依稀聞。正聲定不感凡類。舞躍百鳳千龍麟。安能
學俗兒。一卷不復伸。天公聞否尚未快。一作 安得鐵翼穿

秋旻

答東微之索詩

世味久已諳。多惡竟少好。惟詩素所嗜。決切欲浚造。人安已不休。眾耻我獨冒。有如獯行跡。欲改復自蹈。肝腸困搜尋。吻舌倦搏造。心靈無餘多。為此日有耗。已勤尚無成。既苦每自勞。自笑如秋蟬。饑極不止噪。努力排韓門。屈拜媚孟竈。惟此二公才。百牛飽懷抱。我如餓旁一作者。眈眈不得犒。不知去幾多。窮行竟未到。無門隔藩籬。發罅窺堂奧。愛之不可入。抵觸發狂譟。借使苟有成。不知竟何要。孤名非所求。弊俗詎足傲。况乃非所及。窮海未為涸。不知何時休。定訖死與耄。因疑今世人。恐有我同操。微之才超。高竿幢出標。轟為學尚淹。蘊富藜不宵。暴文章內朱豹。外襲一

以皂。大論尤堅強。推舟出行界。珉硤不施功。徑欲制珪琕。幸此不我陋。教誨日陳告。昨因語及詩。請我使自道。屢謝不得命。迫窄遂顛倒。被堅誘羸兵。伏銳待穿盜。取勝雖必然。窘窮亦堪悼。勉為瓦礫投。幸有金珠一作珠玉報。

寄滿居中衡父

前會去莫追。後見來無期。別嘆後見難。悔恨前會稀。惟吾衡父兄。一作友金純玉光輝。裁磨殺圭角。不與瓦礫齊。大匠陶百壑。不間履下泥。一衡舉千鈞。何棄毫與釐。余獨胡為人。乃不忍使遺。有如橫道芻。萬足踏不疑。子何嗜好殊。獨俯掇一作拾以歸。整束使不茨。欲令雜蘭芝。蘭芝有花香。芻賤雜則非。然其厠置間。適與薰染資。文章每借觀。罅隙窺晴曦。議論使坐聽。穴贖聞英池。春園或承招。遊騎亦許隨。

劇雲愛風枝。藝火圍夜碁。縱談心襟一作襟開張。倒笑冠欹披。
匹馬載以來。東首頸脰疲。夜夢不厭勞。百里夕一馳。想見
日與肩。百障千藩籬。不虞自投置。遂若身遭虜。何時獲因
緣。連筮促馬蹄。誓當盡晨昏。不復起退辭。

謝李常伯

人從東南來。忽得遺紙詩。行義不赫曄。名聲無萎蕤。雖常
誤見辱。旋則拜席歸。別久謂已忘。不圖猶記之。長訂大書
字。顧我已忸怩。開滕把之讀。推與果失宜。劉虎堂羊豬。借
使出類奇。見豺先自奔。遇豢還羣隨。是故古之人。爲己賤
若斯。有聞未之行。季路恐不嬉。名浮過所實。軻也耻以非。
今而承所賜。迺此亦可噫。賢者寧過哉。當是我有瑕。忍愧
讀終篇。喜驚改肝脾。嗚嗚誨教言。舉舉仁義辭。竊令探本

根。喻以海與池。乾坤老六經。遺編爛孔姬。尚恐惑異說。教
之無遷移。強聞終日乾。仁不三月違。卒以二者終。要我勉
不疑。百誦百再拜。下淚如掛縻。交朋百愚諛。此語聞之誰。
憶初從粹翁。睡耳忽得提。震驚破百昏。寐覺悼前迷。今而
去之久。茅塞心叢茨。驟承夫子言。快斧加芟蕪。舊穢忽剗
銷。新涂坦平夷。念當不捨去。戴服同冠衣。猶恐免袒間。復
作須臾離。且將鑿之心。不止涅之皮。二者苟一能。終始庶
不遺。平生苦嗜詩。此篇况驟馳。喁喁夜不休。齧嚼午忘饑。
仰嗟天骨雄。俯嘆人莫爲。星明有常高。日圓無食虧。讀久
口益饑。舌軟涎流垂。想當措意初。嚼雲吐虹蜺。脣牙哆華
鮮。肺腸涌光輝。故其紙上言。飄有霄漢姿。何可對酬謝。約
海量珠璣。

對月憶滿子權

長風掠海來。吹月散百鍊。一作青天豁四壁。雲霧不容線。
窗軒颯先秋。露氣入簟扇。寬一作庭生夜涼。蚊口不得擅。
人靜暮客去。坐偃適自便。清牽睡思醒。明發醉膽健。披風
睨白月。瞪視不為眩。未甘景獨勝。思出大句銜。狂搜得無
奇。猛吐復自吮。篇成若奴婢。氣骨終凡賤。置棄不復收。嘆
感退自旋。起探君寄詩。兀坐諷百遍。駭哉劇雄勁。百札洞
一箭。間逢騁新奇。春雲弄晴霰。古意終重厚。九鼎掛一鉉。
吾嘗笑夫人。語富則自願。及嬰愛君念。始自信惓惓。閨女
當求嬾。慕士在護彥。鄙哉尋常者。何用目識徧。得逢誠幸
多。既別遂堪嘖。乖離時况久。會合卜未先。思之不可見。飛
魂不身戀。秋城崔嵬高。圍我屹若圈。安得擘風翅。飛出不

自殿。乃為相見謀。反覆竟未善。惟當遠相要。共借月為面。
相離苟同天。舉目亦兩見。又况相去間。纔止百里縣。不知
竟可否。寄詩代請勸。

八檜圖

客有要我八檜吟。手攜八檜圖來懸。掛張滿壁揚可駭。眇
顧左右同嗟嘆。旁摹石刻署名狀。各有憑附相資緣。或高
相扶互倚礙。或斷欲蹙猶支顛。強枝拗回信有力。高幹復
俯蛟蚪拳。尋根及株逮條葉。例不拔直皆旁偏。雷疲風休
雲雨去。蛇龍闕。灰猶鈎纏。安分爪角一作牙與尾鬣。徒見上
下相蜿蜒。不知生時竟何謂。畧不參類常木然。宜乎今古
惑昧者。搖擺舌吻歸之仙。一尤盤拳老高大。傳云一作日聃
老由飛蹏。當時駕鹿躡以上。跡有叮嚀遺相連。多應竭殘

鳥喙啄不爾誕者強鑿鑿。聃能惑人已自幸。豈此上去能欺天。借如聃功可升躍。鹿亦何幸飛相聯。于中一本特甚異。膚革逆理紐左旋。傳云聃手所自樹。我知此語定鑿穿。苟令實為聃老植。推以天意猶可言。當年曷不紐以右。若曰世為左道牽。如何衆輒不省究。反重神怪令聃專。乾坤中含萬品彙。此獨自異誰令旃。一作殊窮思竟慮莫可索。欲世不惑誰能奪。仙書虛荒喜誕妄。推說事理尤綿延。世人一讀卽化變。日望飛奮相迷癡。豈非此木久樹此。浸漬亦為異說遷。故其形植與生歿。時以異怪招驚憐。先時世不早斤斧。放其老大訛誇傳。當年同生好材幹。半以直伐成燒燃。憑妖附誕相樹立。卒自歿活終完全。葉枝凋疎不有蔭。材直弗柱曲莫輟。不知留存護養者。竟以何理惜不捐。我有尺鐵大剛利。久已鑄斧磨山巔。卒無柯柄尚棄置。懶乞月桂求嬋娟。

秋夜

秋夕不自曉。百蟲齊一鳴。時節適使然。鼓脅亦有聲。爭喧鼠公盜。悉窳虵陰行。獨有東家雞。苦心為昏明。

答東孝先

純金出鎔爐。烜赫掩熾火。錦成洗春江。衆目眩莫奈。魚鹽物誠微。誤用幸不浣。君家兄弟賢。我見始驚夥。文章露光芒。藏蘊包叢脞。關門當自足。何暇更待我。固知仁人心。姑欲恤窮餓。苟論才不才。自合棄如唾。憶昨西來初。戚惕待客坐。交持駕說口。張闔不可鑠。間發辨經義。鐵舌莫摩挫。高文忽下投。白日駭天墮。眩怖欲前掩。布帛不可褻。初觀

固宜驚獨獲亦堪賀。又如遇貴人。繡錦飾婀娜。回眸忽自
鑑。惡面復窈窕。屈降心已甘。嘆憤志亦頗。雄高豈復爭。愛
恤亦加荷。大詩又一作忽來及。推與太浮過。自無賢可稱。以
是惡甚播。譬如享庭人。豆食止則可。苟強擔石負。蹉跌適
足禍。何以論報心。結草效鬼一作魏類。

寄洪與權

與權江南來。適自滿門會。初無合我志。纔以客面待。時時
相鈞探。稍稍互酬對。根源豁波張。扁鑄失分解。君然領還
嗟。我恐敬若戴。相逢時既多。相待兩交快。予初請子交。子
曰何可外。中又謝不德。卒曰吾而愛。既而第以年。子合我
兄拜。揚雖士云多。往往事冠帶。中間滿夫子。崛起百萬最。
更以子從之。而吾米則糶。朋從偶許攀。會合日與在。春晨

巧誇招。月夕因論話。善狂逸飛蛇。碁毒甚含蠶。相謀務奇
勝。聚口笑拙敗。貪驩不知久。歲律忽移再。余饑奔先西。餓
色面留菜。子待去亦思。書以問我奈。別來君何如。思子我
心癆。朋分無舊歡。世險有新態。高言足瑕玼。俗學牽細碎。
貧知身責重。病覺學力怠。壯心已無多。況去日有退。預期
後相見。頑陋徒老大。好勤寄余書。思子百憂萃。

寄滿子權

子權今謂何。久不治簡書。子素賜我多。豈以此遂疎。予亦
如常時。病與貧相俱。冉冉草沒階。客脚不踏廬。貴者事名
位。崖岸誇懸殊。賢者縱官來。顧我欲取無。惟餘齷齪徒。吾
亦羞與居。潭潭一室空。編帙環三隅。暴陽不憂償。偷飽幸
未誅。且可延朝昏。憂思老頑愚。獨有思子懷。涕下時喑鳴。

冬陰寄滿子權

玄雲載雨惜不下。北風吹急冰相黏。周遮覆蓋不通透。錮結已厚難披燭。微陽未復老陰壯。記去暖律時猶淹。青天何可一日失。漸恐此去無由瞻。日馭自懼不得脫。略出急入地下潛。憑陰託寒恣凌爍。風伯得意一作志欣沾沾。但幸天公不省悟。誰顧下地人嗟讒。隔絕霜露曠不下。帝有潤澤何由霑。非惟勾芽凍天折。亦恐萬類由茲殲。九龍銜火互相暖。稱有日職借不甘。羣兒銳奮不量度。欲仰吐氣吁以炎。惟有壯士抱劍卧。思得美酒聊自酬。

弱弱誰氏子

弱弱誰氏子。鮮鮮一何姝。來奔富人家。妻與富人俱。一作居嚴一作華粧問夫子。我豈彼室如。夫子笑遣之。彼寧與汝都。

升堂一作褰裳由阼階。德色溢以舒。親賓不敢笑。退語相噉吁。高堂聚羣婢。唯諾相咨睢。家事忽不圖。顧指取自如。朝令折桂薪。暮遣藩籬除。風雨半夜來。日黦生不虞。屋壓盜隨至。夫死別嫁夫。東鄰有淑子。性一作恬不事鈔朱。端居待人求。正色不願諛。清鏡見一作照白髮。行媒不顧問。不知愛妻人。取捨何異歟。

答黃藪富道

角角適時足。力走猶或遲。從而不逮人。不若坐視之。而予始用此。已無先人思。間自念斯世。固亦未易為。以其得而慚。曷若退自宜。老身可孔顏。餓死猶夷齊。予心最樂此。尤喜用自持。豈將六尺軀。賤易五羖皮。但無百畝田。一作得抱剛氣歸。年來事窮蹙。露暴無自依。姊寡不能嫁。一作無家又

作不兒孤牽我啼平生事文字無路活寒饑勉從進士科
得家束若縛襁兒時時忽自笑一作笑往往窮加悲一作還有
如高飛鳥中路饑自低銳知從食來不一作意身投竊神
龍拏白日挾雨萬里飛使其口有銜安得無馴隨雖然平
生志固未忍散遺間時自開縱哦吟助噓噓纔將舒已私
豈敢偷人知黃君道德者術業何願願手提九黃鐘苟取
折籥吹縣知失氣類誤以倡和期不知里社歌不可郊廟
施况余衰病餘有氣亦已卑加之困俗學羝角方牽羸陳
詩盡自道幸子憐無疵一作

春風

春風東來暖如噓過拂我面撩我裾不知我心老有異亦
欲調我兒女如庭前花枝笑自愛風裏草力更相扶芴林
曲樹足飛鳥不聞燕雀鳴鴛鳥求雌要雄各有意豈但關
競爭春呼春巢成多夏卵眾明年計此更有餘非唯喧呼
亂人耳漸恐巢穴妨人居收殘射中豈無道我亦力可彎
長弧林深枝曲矢不入况弓待借家所無行吁坐眄不可
奈安得靜默投身俱

哭詩六章

死者徒已歿思之恨無涯生者非素心還作死者嗟今古
悲略同斯道竟奈何哀絃直易絕哭詞曲難歌
朝哭聲吁吁暮哭聲轉無聲無血隨盡安得目不枯目枯
不足嘆無目心安目存多所見不若無目完
切切切切切淚盡琴絃絕憤氣吐不出內作心肝熱朝漿
渴不勝莫潦濁不清何以慰我懷安得滄海冰

哭莫傷滄海。淚落長海流。流深風濤多。駕蕩覆我舟。不若
灑春草。荆榛蕪蔓莖。怨氣觸草死。猶得香蘭生。
朝歌憂思多。暮歌無奈何。偶嘆氣亦絕。未慟血先沱。淚落
入口少。不如出眼多。安得堂堂軀。不為瘠且瘡。
目雖淚所出。由來心乃源。白日睽我面。意欲乾洗瀾。而不
照我心。我淚何由乾。况在重雲遮。使我何自安。

張巡

祿兒射火燒九天。鬼手不撲神聽旃。羣庸仰口不官噓。反
出長喙噓之燃。睢陽城窮縮。死隘危繫一髮懸。九淵巡瞋
睨遠。兩臂拆怒嚼齒碎。鬚張肩恨身不毛。劍無翼不能飛。
去殘賊。嚙翁軀。腥刀子磔。俎日嚼肉血。猶經年。霽雲東攘
兩臂去。西來才有九指還。胷中憤氣吐不散。去隨箭入浮
屠塼。忠窮智索莫自効。更戀愛妾嘗饑延。我疑沒日賊不
食。恐其肉醜死不痊。又疑身骨不化土。定作金鐵埋重泉。
何時山移陵谷變。發出鼓鑄戈或鉞。吾如得之願有用。不
誅已然誅未然。

贈李定資潑

涉川固有道。造舟不如梁。曾聞水覆舟。不聞死乘扛。奈何
揭厲子。先先勇褰裳。豈盡水害人。固亦謀非臧。

鳳雖謂靈畜。無竹或

一作終

死饑竹今無方。無鳳來亦云

一作

何時使之羣

一作隨

鷓鴣。饑飽為止飛。非惟失所靈。亦與彈

射期。

坦坦誰之田。施施緝且弋。烏來玩其機。鵲至喜其食。長鴻
飛冥冥。志與萬里極。豈無啄飲心。寧饑不人得。

湍激日蹙蹙。風稜勢漫漫。奈何舟上人。試死才一間。苟不
以利涉。安坐思誠艱。客雖懼謀梁。而木嗟在山。

古廟

古廟隆隆敞庭扉。風雨剝壁頽柱榱。我來安知神所依。穹
堂窳宰風幡旒。神君龐軀突鬚眉。視我睨睨坐倨箕。惕磔
觀者駭不怡。羣鬼後先張福威。直東之廂步逶迤。日益所
見怪可噦。馬牛羊犬雜豕雞。或戴以首芻四支。間有人面
身亦非。老祝趨前爲衆詞。口吻嚙嚙言嗚咿。稱別狀類頽
東西唱號名字分何誰。空虛冥漠非所期。豈亦以此爲人
尸。視其膚革已彪狸。寧有中反恬肝脾。又有械器身挈持。
傳言厲疫此乃資。古之日行歷虛危。猶恐盛陰鬼所隨。磔
儼于門驅使馳。今安取此廟以祠。不念延虐殆疢羸。農凶

年多苦饑饉。苟幸得飽不擇祈。來則拜叩盡敬祇。幸天之
澤偷自歸。民德且恐報之時。餼肴豐鮮牲魚肥。欲奠以獻
更濯卮。進謝千語拜百低。工鼓于庭巫舞衣。祝傳神醉下
福禧。農謝神去祝徹之。庭前剪割棄餘遺。鵲鳥下爭趨不
飛。回顧神面如故時。意者不爲祭謝移。嗚呼神固信。作非
吾知。

雜詩

方春不種蘭。終歲無自佩。良田弗加芟。徒穉亦無歲。空令
雨露恩。日夕被蒿艾。安坐饑怨天。此理果誰在。
一日不爲田。百草已有根。况復閑三時。其穢何待論。豈不
有錢鏹。徒羞慵借勤。歲晚憂不耕。何獨議耒耜。
穉穉晚春樹。上下聚百蟲。不有口似蠶。則生尾如蜂。設不

二者然亦徒生無庸。清陰不可居。晚歲還秋風。

答問詩十二篇。寄呈蒲子權。有序

今既愛盧仝蕭宅二三子之詩。而猶恨其發之輕也。然忘其効而更重之。則得矣。逮子權之起予。予實慕之。輒為十二篇。其題亦不易。子權所謂東墅諸子答問者。予獨廣之爾。其水車之篇。獨異于子權。然特其文則然。吾知子權與吾與。它知詩者謂為異也。

罇問未

金堅雖不磨。木曲亦已撓。幸蒙主人用。反要主隨走。適從慵耕兒。雖功不見取。良田常無收。何塞不耕咎。

未答罇三首

我用常在金。任金適由木。苟得金為用。何惜木微曲。幸得

主人隨。不恤汗行犢。必求隨主人。我用誠不足。

我用于主人。良田無虛種。主人不我以。我適為無用。不知

主人饑。卒歲安自奉。由來我求人。孰與求我重。

我必為人用。不必用于人。若也責不耕。君其問諸田。

未問罇

一畦失之荒。爾力亦可耨。天下方漫蕪。爾功亦何有。

罇答未

天下方漫蕪。顧我適有庸。使其已除脩。我將何以功。我豈大無効。自是用我慵。

未問芥

子芥誰爾為。黑白太分別。朝伐一樗歟。暮伐千樗藥。爾終不自謀。幾日不缺折。

斧答耒

大樗吾猶伐。小樗何畏藥。吾缺猶俟磨。爾折將奈何。

水車問龍

來何必召雲。去何必飛天。我名不為龍。何能雨爾田。

龍答水車

神龍謝子車。子能未足多。上澗雖已然。下竭將奈何。

水車謝龍

水車謝神龍。下竭固無奈。旱則我為用。爾龍尚何謂。

龍謝水車

神龍謝水車。吾語爾來前。爾雖用于人。我亦用于天。在物

固不同。于用豈殊然。水下高田乾。爾能俯水取。假人不爾

用。爾售田責否。吾雖身為龍。動亦天所主。天猶不有命。我

安事為雨

中夜

晝日苦卒卒。忽焉不加思。長夜漫不眠。起復日所為。所為

浩多愧。不與初心期。虛云聖賢學。實從庸俗歸。雖耻猶奈

何。長歌涕垂頤。

書懷寄黃任道滿子權

西風吹雲空。晴日露高曬。駑馬無速騁。歸客思遠屆。長林

剝霜紅。遠水漾寒派。露蟲悲白日。一作啜。風菊老尤介。昔予

來方春。焰焰樹生態。今歸亦未幾。馬踏落葉壞。時物固有

然。盛衰信難概。吁嗟為生勞。黽勉計無奈。伊余有遐致。久

此。以俗械。嘗思擺絕去。自放出世外。高懷樂天寬。遠目斥

人礙。有田足晨昏。有圃具菹菜。父母不待養。妻子固易賴。

世孰得丘山亦孰失蒂芥人自能輕重吾將守所愛六經
老誠明萬古孰成敗得時爲醯鹽滋味和鼎鼐失猶有萬
世令名自沽賣自視久已明決不俟謀蔡寄詩侑子觴期
子和而再

令既有高邨之行而東孝先兄弟索余詩云

擾擾利學者久不可與謀讀書乃何爲老不知軻丘弗恤
義所在務期高爵收嘗聞失則嗟不聞得之羞知誰洪其
源使世乘其流于今已汗漫更久將溯游嘗聞古人言饗
餐爲其鬼謂惡豈必多偷飽德弗脩不知自思者捨此何
所由故予早知懼誓將異人求寧爲寒餓嗟不同富貴謳
此行况存獲師德高前修因嘗請子行勉子無逗留于吾
乃何有同病不獨瘳雖愛謂子然尚疑子終不惜子有高

林竿幢揭華旒苟能自擺去不爲世學囚行將見遠到強
弩射弱叢何必請予詩自合治子輒

酬東丈貺詩兼叙所懷

白日立中路犬去不形相夜以盜自來何敢怨犬傷主人
忽加念謝怒犬無良盜子諛伏前有言願加詳見賜固已
多怒犬誠未滅

卜居

吾求一屋逮兩月貧不謀貴何以圖榻來自放就窮巷幸
得之喜何敢吁顏簷斷柱不相締瓦墮散地梁架虛門無
藩闌戶不閉時時犬窺入自居主人憐我莫自致爲我補
葺加墜塗翻翻匠氏乃誰子頡頏作氣厲叫呼羣庸洶洶
助聲勢脾脫凌我要我酷歸來嘆息無自得兩日纔致酒

一壺徵多債。少意不愜。棄我忽去。如逃逋。重來聞寂不可
問。依舊四壁。編空蘆。嗟予雖貧。日猶爨。可不善爲。盍釜謨
外戶不閉。古則爾。今也盜賊通街衢。乞錢買籬作藩固。更
學關鍵防朝晡。鄰翁問我乃何者。得無亦以自名儒。王朝
潭潭聚冠蓋。幾人不載卿相車。子何布被不蓋肉。浪自名
士實則奴。假爲無能等編戶。猶可自擇安閭閻。胡爲慘戚
卒困此。去矣何屋不可徂。此居卑洼不待說。四高中下流
無渠。夏霖連延久積注。往往竈下秋生魚。始來圖此不自
擇。終見坐與蚯蚓俱。何況梁椽日蛀腐。一仆非爾力可扶。
苟求暫安。急且夕。反以身就殞。壓虞。迺知窮則失自愛。死
得正命。有幾且。翁乎爾言誠得矣。我方困甚。非真愚。

送李公安赴舉

行子冠上塵。梁宋道傍土。塵逐冠弊拍。人來還復去。馬蹄
日月長。踏盡西北路。近日何紛紛。姿狀頗秀舉。傳言天子
詔。士得四方赴。來如鵲翅翻。去若蠅頭聚。市兒屈指計。過
百日未暮。昔周方盛時。得士纔十數。唐虞此爲盛。中復容
女婦。昔何稱才難。今也寧異趣。但恐所取異。今古殊尺度。
夫君乃高才。久有及物慮。今又奮絕去。挺拔欲自樹。余窮
非所知。久有山林素。但無百畝粟。乃就羣才賦。仕道得亦
嗟。困窮失爲懼。二者各有命。子亦何所與。

離高郵答謝朱元弼兼簡崔伯易

昔來何悠悠。今去亦泛泛。豈自果進退。姑且便飲啜。三代
去今遼。士食久已濫。徒歎不爲義。可無苟石擔。平生墮百
爲。且就役鈔槧。束身入世程。開口就人歎。怒喜有失得。眉

睫煩窺瞰。野鳥或在籠。山猿有終檻。能安此爲命。雖失亦
何一作憾。予嘗勇自明。磨古得前鑑。抱關賢所容。較獵聖
或暫。庶未負初學。尚爲神所監。予行人之嗟。我笑不爲領。
子獨辱所厚。以詩繫歸纜。命和始自書。狂言庶非僂。

山陽思歸書寄女兒

淮風晴舒舒。楚水日夜流。風能駕吾帆。水可載我舟。余歸
知幾時。子望懸百憂。念我兄弟寡。商參各殊州。十年不一
逢。會合何所由。幸逢子來歸。與我相慰投。甥兒入吾牽。甥
女出我留。子吾笑其間。貧不知可愁。心如熙春陽。樂若醉
九酬。憶我別子日。將行更逗留。泣恐傷子心。淚出仰目收。
別日纔幾時。別思日九秋。心隨西北風。日望東南樓。主人
仁且賢。憐我羈旅游。晨粳玉炊香。暮酒金注甌。盤蔬羅春

白字再押

青。豆脯兼夕鱸。爲食豈不美。義咽不下喉。要當歸子同。半
菽飽亦優。始予志所學。義當望軻丘。竭來與世訐。衆口忽
起咻。嘗觀世金朱。此道久已偷。胡爲不奮去。附世如贅疣。
而子亦待人。特以貧不謀。參差兩如此。偃蹇勢略侔。要當
其引去。逸出世網罟。遐追避世徒。子與侍巾裘。吾將亦要
婦。力以石臼求。買田結歸廬。種樹屋四周。子居課桑蠶。我
出鞭耕牛。教妻績以筐。使兒餉來疇。坐笑忘歲時。聚首成
白頭。歸乎富何時。詩以侑子謳。

大舟

大舟無風帆不舉。小舟榜入青冥去。舟中漁子呼且歌。夜
半鬪魚誰得多。

望花有感

春來幾時余不知。但怪日日柳稍好。我嗟無地自種花。常恐東風只生草。誰家有園不可入。時時縱足信自到。寒梅最香落已闌。桃杏雖遲亦顛倒。高枝飛鳥夜踏空。低樹狂兒日摧拗。惟餘零落滿地紅。主人更聽奴頻掃。歸來四顧慷慨歌。要且傾酒澆顏酖。春歸欲挽誰有力。河濁雖泣庸奈何。

餓者行

雨雪不止泥路迂。馬倒伏地人下扶。居者不出行者止。返午市不合。人空衢。道中獨行乃誰子。餓者負席緣門呼。高門食飲豈無棄。願從犬馬求其餘。耳聞門開身就拜。拜伏不起呵羣奴。喉乾無聲哭無淚。引杖去此他何如。路旁少年無所語。歸視紙上還長吁。

暨陽居二首

出無王事牽。入不治居舍。蒿藜入墻屋。塵垢變几架。糟糠苟無憂。智力取自暇。逢詩卽廢日。得客輒忘夜。積懶遂成性。習勤反如詐。幾不類怠傲。愧耻將何謝。身非爵與官。車馬久不謀。家無田倉儲。雀鼠非我仇。朝出從人居。詩書講前修。暮從兒子嬉。歡笑何所憂。閑將筋力疲。懶使志慮收。斗稻尚煩送。誰謂能無求。

謝客二首

擾擾車馬客。各以勢利奔。自問閭巷人。何爲亦紛紛。與客成往還。勉就俗所敦。禮不經聖人。頗厭後世煩。欲問無所得。歸視紙上文。以非孔子心。尚拜陽貨豚。乃知徧人間。心跡久已安。去矣可奈何。更問來者門。

蹉蹉出何爲。奄奄歸就卧。不知身所謀。徒與俗相和。本無
聲利求。一作營久厭車馬過。詩書雖滿前。奔走不暇坐。收身
衣食餘。抱病歲月破。得不勝所忘。進亦何可課。前躅杳一作
難躋。下愚旋易墮。得勢有然爾。命矣何可奈。一作非

春游

春風誰相呼。鳥語到庭戶。罷書起何游。一作往繫馬城西樹

寧須客衆隨。聊與春相遇。高林美風竹。疎影有清覆。可以

便行坐。解脫快巾屨。日長天地寬。飄戾飛雲度。風枝綠未

柔。一作舒日萼紅先露。芳辰信可尚。嘉興惜無寓。舊聞黃公

壚。頗一作屢枉壯士顧。予雖輕數子。自適偶同趣。起解身上

衣。就賞青旗酷。獨酌不待勸。興至還自注。對物無所語。似

若喧譁惡。雖無歌舞歡。幸可篇章賦。乾坤本閑暇。人物自

紛遽。勞生曷不樂。歲月失已屢。酒闌起四望。落日不可駐。

饑馬自知家。何須問歸路。

送曹杜赴試禮部

霜風琅琅鳴鼓鞶。鳥寒夜噪樹折枝。居者不出行者歸。厖
馬解銜車棄脂。長河夜水船就維。百賈晏起朝閉扉。爲問
當今行者誰。出門千里到何時。母送拊背父嘆嘻。兒惜欲
去哭挽衣。上馬反顧紛涕洟。非所願欲去何爲。家雖有田
豐歲稀。所得償公不及私。况望羶腥事庭闈。結髮從學今
十暮。始自有志狗孔姬。豈願從世成依違。高堂華髮紆素
絲。暮年待子爲光輝。望我日久莫報之。苟得一笑辱弗辭。
况望舊作三釜家無飢。吾于二子久所知。怪其才高所就
卑。今乃語此誠可悲。近聞天子變典彝。欲撥舊冗收新奇。

子行出仕適其期。驂騑得路無銜羈。罷酒行矣無自遲。去取天寵酬親慈。

野步

久嬰末俗喧。脫就綠野靜。方求巾屨便。那暇賓客命。林紅落春衰。草舊本作桑綠爭夏盛。時從老農語。久佇行子聽。謂言勞苦後。各以閑暇慶。時逢瓶盎沽。亦有肴核稱。喧嘲忽無次。歌唱仍相詠。酒闌紛起坐。白髮忽一作或兩凭。兒乘旁樹嬉。牛卧前籬暝。予方困俗累。愛此近天性。何當從之歸。買舍與相並。

古風

古風何寥疎。世方盛夸慕。利塗劇先趨。直軌迷曲駐。渾渾九河翻。仡仡百川注。分爭或多岐。斂枕纔一趣。睢盱承至歡。聳疊謝絕怒。財得升斗多。勉售形骸屨。不知萬鐘得孰與。一日裕况承丘山羞。願易頃刻遇。誰能脫近役。自放就遐鷺。航湖足菱魚。拔野厭芣茹。行招千古游。坐與來世語。延風敞虛襟。揖月坐嘉樹。此意固有然。童兒未堪預。

旅次寄寶覺訥師

小雨破宿暑。曉風忽焉道。山深樹翳陰。蜩螿應已秋。清坐想高絕。語言誰應酬。豈不念一往。抱病終自留。羈旅少往還。有來或非儔。命僕一謝之。縱我冠屨休。移牀上高堂。解書散牀頭。于此有嘉興。念世誰與謀。獨思山林人。茲意可綢繆。何當買田廬。共遂丘壑游。

寄呂惠卿吉甫兼簡林伯通

跋跋門外馬。客至知謂一作誰昔面尚未逢。那論心相知。

揖客拜上堂。一作拜客謝客辱弗遺。寒暑相問酬。唯諾坐無爲。靜默近尤怨。多言足瑕疵。勉從客所論。還顧所學非。念此廢無益。對書坐長嘯。一作爲此嘆無益廢書坐長嘯獨思同懷子。念遠莫見之。豈無寄我書。歲晚得苦遲。聞頗困王事。豈無閒暇時。况有同僚賢。相期在詩書。人生天地間。常苦食所糜。去就兩莫謀。會合寧有期。余病不自樂。舊學益以隳。近者非所同。遠者勞夢思。江水日夕東。道塗宛而夷。寄書當在勤。無謂還往稀。

答逢原

呂惠卿

晨出趨長司。跪坐與之言。偶然脫齟齬。相送顏色溫。歸舍未休鞍。簿書隨滿門。相仍賓客過。欲午僅朝餐。平生性懶惰。應接非吾真。况乃重戕賊。良氣能幾存。就夜前

得息。閱我几上文。開卷未及讀。睡思已昏昏。自知小人歸。昭昭復何云。每于清夜夢。多見夫子魂。側耳聽高議。如飲黃金樽。覺來不得往。欲飛無羽翰。昨日得子詩。我心子先論。怪我書苦遲。友道宜所敦。豈不且夕思。實苦案牘繁。豈無同官賢。未免走與奔。相見執掌間。有言無暇陳。嗟嗟茲世士。無食同所患。念我力難任。聞子謀更艱。久知爲之天。安能怨窶貧。吾聞君子仕。行義而已焉。亦將達吾義。肯遂爲利率。東海有滄溟。西極有崑崙。古來到者誰。不過數子尊。子已具車航。吾亦爲檝輪。欲一從子游。不知何時然。

寄崔伯易

擾擾閭巷士。過我何所爲。屢來徒我煩。不來我弗思。少年

樂知聞喜與客子隨。晚歲事恬默。與世益參差。騎馬出尋人。中路輒自歸。歸來亦何樂。書史自相期。已與往者親。可無茲世違。欲語無所得。起視北雁飛。念子遠千里。昔別今已暮。寄聲雖云多。所得竟亦稀。近者忽報書。期我往就之。不知予苦窮。繫此不可離。尚迫朝暮憂。寧有道路資。人生少所同。老去纔幾時。予勢既若此。子復不官來。但恐百年間。齟齬終莫齊。詩以寄子招。亦以寫我悲。

寄孫莘老

默默不自得。勞勞非所任。不與君子逢。誰復明此心。偶客來自南。口有千里音。知無木索勤。頗復山水吟。對之爲一笑。欣如獲千金。宣城風物佳。古語昔已忱。太平又其右。道塗邈幽淡。溪流渺彎環。山勢屹抱臨。况復寂寞人。黃綬事陸沈。公田秫既收。客席酒屢斟。悔予昔南浮。不往一就尋。波濤忘日月。疾病廢古今。歸來就羈銜。外慮日已侵。適時愧非才。對客輒自瘖。譬如火炙膚。暫忍久莫禁。唯思百畝田。爲可足釜鬻。投身脫世箠。斂足蹈古箴。寄言所同懷。相期在中林。

夏日平居奉寄崔伯易兼簡朱元弼

天風變春和。晝日差夏永。門關閉無事。燕雀去益靜。紛翻詩書帙。棄散懶收整。時來就枕卧。復可取窺省。心恬逐物閑。迹濶與世屏。鮮鮮南山暖。秀色上脩嶺。苟嫌安坐慵。還可遠游騁。自緣智能薄。反得閑暇幸。交朋友久相遠。疎懶欲誰警。

懶懶庭下樹。陰影日已敷。癯癯閉門人。簞席自卷舒。高枝

就懸冠曲枝挂裳裾一作還來從此息卧視詩與書栢栢
門外客從駕驪駒不知來何聞一作乃肯顧我問呼兒
往應門謂言出在途非我敢厭客非客與我疎以予拙語
言無以得客娛一不當客意恐與世患俱不如兩相忘何
能効紛如

送朱明之昌叔赴尉山陽

朱侯拜書天上回去以身試百里障青衫飄若風外荷借
馬載出塵土上準眉嶄嶄見天秀如立繫馬萬里望身軀
雖小曾腹寬沛如絕海橫秋漲久宜脫絕事高致豈願卑
冗勞俗狀高堂華髮親老矣四海無家寄几杖世外言高
信獨奇人前腰折嗟已強尉官雖小俸雖薄猶有餘錢買
甘養想當家帷奉顏面綠衣躬率婦子餉說說兒女戲滿
前累累諸兄坐相向人間此樂不可幸一笑自足百辱當
時清固應稀盜賊俗弊寧不煩咎掠好偷閑暇事簡編思
我寧無文字况

學子

瓊瓊來學子從我問古風一作言古之人學不求世功
以其明智餘施與天下同能知學為身自不恤窮通童子
顧我笑是言得無蒙斯道使可遵曾不聞父翁謂言童子
歸盍自謀厥躬吾不能爾言一作吾能亦不必爾從

寄滿子權

昔心何悠悠今學益漫漫恭如浮江河浩不際涯岸生雖
樂文字勤不償几案重編空堆塵折簡久枯汗徒如陳市
肆表列環四畔已無探討勤胡可賢否按零丁晚觀玄混

滅舊習象得指來歲期。失念去日算。嘗聞勤惰間。已是愚
知判蒙羞。欲何顏。避耻愧無翰。不能繩已怠。何力禁人叛。
文章觸世嫌。議語限客竄。時牽好惡甲。俗撓是非亂。早衰
奪舊剛。多病襲新懦。心經衣食難。事廢米鹽半。何謀脫身
去。割跡與俗斷。耕荒食新收。鑿室復舊貫。念生如冬水。至
灰僅春泮。其間能幾時。何恃苦自緩。翩翩淮南英。顯顯士
林觀。方子未爲遊。辱子昔同開。篇章覲新華。論說聽橫捍。
包奇晚自走。去實王府玩。近書何相撩。頗以名見謾。不知
老者拙。棄此久已斷。方勇自樹解。轡縱新駢行。期拾春
青采。綬綰歸腕垂。離思舊歡遷。徙就新絆無。琴雖自歌有
酒欲誰伴。閑暇當寄詩。持此資賀換。

暑早苦熱

清風無力屠得熱。落日着翅飛上山。人固已懼江海竭。天
豈不惜河漢乾。崑崙之高有積雪。蓬萊之遠常遺寒。不能
手提天下往。何忍身去游其間。

寄王正叔

微生不過人。氣力兩眇麼。力學失自謀。徑古趨今左。病世
相陷賊。樹性期剛果。豈不中是時。然亦未嘗過。奈何衆好
殊。未語咻已夥。俛俛獨何之。去去銳亦挫。忠言不售耳。直
面屢得唾。怒目曠以環。詢口焰而火。出門先自羞。有衣恍
疑裸。過市不成步。侶距侔鼈跛。周旋不出扉。迷若蟻循磨。
人惡固爲甚。自厭近亦頗。媚世定有術。欲學從誰可。必也
泥自售。恐由此始禍。賢子遠相問。幸有以教我。得報速是
宜。翹企不容坐。

雜詩效孫莘老

魚鰕無所能。動輒因人得。蛟鯨能則垂。覆舟取人食。龜鼈雖謂殊。剝剝同一劇。龍不入網羅。亦不為人識。犬羊養於人。壯則人食之。猛虎嗜人肉。終昧獵者機。豺狼與狗同。為害豈必威。封狐能為人。還作行子妻。

雜詩呈逢原

孫覺

鴻鴈最知時。未逃羅與網。不能忘稻粱。千里安得往。鳴蜩腹空虛。見啄因其響。丹鳳穴九霄。虞人常夢想。

呼雞

雞呼雞來前。犬吠犬至止。夫豈必可召。役以食乃爾。今吾曷為悲。人而雞犬為。自計無自存。西山謝夷齊。

姚堅老見約偶成

初正布新和。餘臘爭近候。升騰陽力微。惟怯老陰鬪。江雲蕩空碧。一作疎朝雨沐清晝。林稍釋冬枯。土蘗壯春蔕。

萎蕤風日舒。刻畫山野秀。關關先春鳥。格磔弄晴味。無人與調和。終日自嘲詬。唯君卜近適。過我許來就。遷延日屢蹉。嘆惜月復穀。人生誠多故。世事那可究。唯當自推置。障絕俗慮。寇休閑倘能偷。疎懶當自宥。徒行苟憚勞。借馬欲誰廐。清醕如定攜。佳客可先購。勉之無使遲。梅萼已堪覲。

初聞思歸鳥憶昨寄崔伯易朱元弼

去年春日花盛開。嘗有鳥啼歸去來。余詩告爾東海志。子笑屬我南山杯。將希遐躅蹈高軌。就拔去跡離俗埋。同時游者最誰上。朱子峭擢凌春林。門關午景卧正懶。過我呼號如春雷。鄰驚偷窺婦女怪。婢駭奔一作走兒童。哈門開

廣陽詩金
納坐聽論列。笑口侈哆傾。曾懷寒道半。菽要同飢。藿醬叫
乞喧。鄰隍僧從南。浮橐異角尉。解西去。亭遺臺。心爭誇漫
詰。蜿蜒目樂虛。豁留崔嵬。柳稍黦黦。空晴絮。杏花爍爍翻
遺埃。春湖平。渟照空碧。淮帆曉上。攬天桅。西歸頗。阨窮餓
久。南泛未免丐。乞哀。竭來隨人事。卑折忽自顧。影漸低。摧
平時客坐不敢語。苟以唯諾償。嫌猜。曾中約。結浩千萬。到
口不吐如橫枚。比來頗自撥俗碗。日倚竹樹良徘徊。昏昏
萬事置不省。知已疎。懶心難裁。一聞春風動。啼鳥。猛若重
睡。忽喚回。咨嗟歲月急。若失。嘆息無地安。蒿萊比于見人
日加懶。行恐合俗老。益垂。不知飄浮寄茲世。竟亦何計收
形骸。春林沾沾風日好。飛止自便宜。爾諧何爲猶道歸不
得。世間萬事真悠哉。

思京口戲周器之

江南別日醉方醺。貪愛青天帶水痕。忘却碧山歸路直。誤
投浮世俗塵昏。終期散髮江邊釣。當有漁舟日繫門。但恨
故人猶喜仕。他時曾腹未堪論。

寄束伯仁

身逐南舟去不迴。匡廬留滯得衰回。峰頭夜宿平看斗。巖
下朝陰俯聽雷。西顧波濤浮日月。東歸天地入塵埃。何時
得遂幽棲志。常把韋編靜處開。

對花

憂愁卒卒人無樂。花草紛紛物又春。安得無憂與無慮。對
花還作笑歌人。

春遊

春城兒女縱春遊。醉倚層臺笑上樓。滿眼落花多少意，若何無箇解春愁。

春晚雨後

東風柔弱事春權。劇雨無端轉愴然。不惜好花都委地，却令遠草直平天。龍蛇久蟄應思奮，蛙蝸乘時已自先。綠柳由來却堪笑，葉眉愁劇遂長眠。

紙鸞

誰作輕鸞壯遠觀。似嫌飛未多端。纔乘一線憑風去，便有愚兒仰面看。未必碧霄因可到，偶能終日遂爲安。扶搖不起滄溟遠，笑殺搏鵬似爾難。

古鑑

一片靈光合有神。不知鎔鑄竟何人。春耕破冢衣冠盡，鬼手摩天日月新。鑑面祇知西子姣，照心難見比干真。主人深有收藏意，當待清明不受塵。

和東熙之雨後

獵獵風吹雨氣腥。誰翻碧海踏天傾。如何農畝三時望，只得官蛙一餉鳴。何處斷虹殘冷落，有時斜照斲分明。雷車收轍雲藏跡，依舊晴空萬里平。

幽居感懷寄滿子權

卜得幽居四絕鄰。尋常庭巷斷蹄輪。門前犬豕卧橫道，城上牛羊下視人。滿眼夕陽閑草樹，回頭歸路正埃塵。思君未見東來計，何日雙眉對面伸。

秋懷寄呈子權先示徽之兼簡孝先熙之

樹哭寒螿草哭蟲。何堪羈客憤時窮。卒無可樂羣書外，百

不堪言一嘆中。雲黯暮天沉白日。土塵平地斷清風。夫君
若問秋來况。淚滿遺編髮亂蓬。

九日寄滿子權

懶將衰病照清流。爲有歸心欲白頭。幸自好花開便笑。不
甘爲客見成愁。長歌欲強秋風醉。高處先輸俗子遊。我在
無聊元亮死。當年今日共悠悠。

次韻子權京口夜宿見寄

寒江漠漠客帆稀。獨泊扁舟望翠微。已寫綠醺聊自適。更
邀白鳥共忘機。水閑海月寒初上。樹盡秋城碧自圍。嗟我
相思邈千里。不來同此兩忘歸。

答孫莘老見寄

高門鞍馬日光榮。勢力紛紛起共爭。偶以不能聊自便。敢
于茲世獨求清。生無人愧寧非樂。死有天知豈待名。客食
官居同是苟。何須稱別異平生。

登郡樓

江城朝雨濕晴煙。樓上風帆送去船。苟得息肩閑歲月。時
來開口笑山川。田園啼鳥三春日。江海扁舟萬里天。何計
脫身來此老。青山白髮兩忘年。

感憤

二十男兒面似冰。出門噓氣五蛇橫。未甘身世成虛老。待
見天心却太平。狂去詩渾誇俗句。醉餘歌有過人聲。燕然
未勒。在不信吾無萬古名。

登瓜洲迎波亭

海面清風萬里寬。偶來如已脫塵關。自嗟客世無虛日。却

被斜陽占盡山海島不來青嶂靜漁師歸去暮江閑從來
雲水有期約直待功成是厚顏

意潤州葛使君

六朝遊觀委高蓬想像當時事已空一作清談半夜樓臺
橫海日萬家簫鼓過江風金山寺近塵埃絕鐵甕城一作
高氣象雄欲放船隨明月去應留閑暇待詩翁

何處難忘酒

何處難忘酒窮才世不知出門無直道開口礙當時白髮
無端速青山不忍歸此時無一盞何以活餘黎

庭草

平時已多病春至更蹉跎惡土種花少東風生草多客愁
渾寄淚野思不堪歌獨有詩心在時時一自哦

秋日寄滿子權

樓前暮靄暗平林樓上人愁意思淡未必薄雲能作雨從
來秋日自多陰三年客夢迷歸路一夜西風老壯心欲作
新聲寄遺恨直絃先斷淚盈琴

江上

暮暮荒城沒遠煙暮雲歸族忽相連春江流水出天外晚
渡歸舟下日邊杏萼春深翻淺纈柳花風遠聚晴綿無錢
買得江頭樹輸與漁人繫釣船

送聲隅黃先生

黃風吹土截天橫瘦馬着鞭驅不行尚說苦心酌直道誰
知白髮為蒼生平時恬忠蓋常日公卿足仰成雖有
英雄無用處却令老去買牛耕

寄介甫

天門簾陛鬱巍巍。勢利寧無澹泊譏。難與跖徒爭有道。好
思吾黨共言歸。古人踽踽今何取。天下滔滔昔已非。終見
乘槎去滄海。好留餘地許相依。

寄滿子權

窗前午枕夢忘還。門外清風晝掩關。天下誰當千古後。牀
頭自笑六經閑。能將道繫窮通裏。安用身干進退間。自愧
公心猶有蔽。清時無日不思山。

寄都下二子失舉

大學齋鹽共苦辛。寒窓筆硯日相親。梁王臺畔一分袂。楊
子江頭三換春。篋裏黃金須買酒。鬢邊白髮解欺人。窮通
得喪誰能定。况是男兒有此身。

次韻滿子權見寄

當世雄圖不可懷。退居蒿艾自沉埋。門無來足荆生道。病
不能鋤草上階。自是直方違世易。况將疎懶合人乖。無由
與子同樵種。回首平林浪可柴。

病中

十日身無一日寧。病源知向百憂生。寒侵騏驥應方瘦。蠹
滿榭楠豈易榮。小閣晝閑書帙亂。畫堂風靜藥羅聲。北山
扶杖終歸去。寄語巖猿莫曉驚。

金山寺

萬頃清江浸碧瀾。乾坤都向此中寬。樓臺影落魚龍駭。鐘
磬聲來水石寒。日暮海門飛白鳥。潮回瓜步見黃灘。常時
戶外風波惡。祇得高僧靜處看。

登甘露寺閣

忽忽勞生歲月催。時偷高迹出浮埃。風沾草樹紅朝動。春入川原綠夜回。欲出壯懷臨八極。可無樽酒到高臺。江山不與人相語。似待忘言野客來。


謝張和仲惠寶雲茶

故人有意真憐我。靈苑封題寄華門。與療文園消渴病。還招楚客獨醒魂。烹來似帶吳雲脚。摘處應無穀雨痕。果宜同嘗竹林下。寒泉猶有惠山存。

太湖

西南無盡望。吞恐落吳郊。海近私憑蓄。天低不敢包。蛟龍宜自宅。蝻蛭莫令巢。遠浦纔分點。歸橋略認梢。水乘湖更濶。地過底宜坳。鳥截煙維斷。風凌浪脊交。大橋橫作畫。別

岸缺成爻。吟恐詩無氣。圖憂筆費鈔。歸輸范蠡得。官許李鷹拋。去憶心應繫。歸誇口定譏。窮何須蹈海。來好卜編茅。著戶生同隱。居民釣自庖。滄浪未容濯。魚榼夜停敲。



後山詩鈔

二十

陳師道字履常一字無已號後山彭城人年十六謁曾南豐大器之遂受業焉元豐初曾典史事以白衣薦為屬尋以憂去不果章惇冀其來見將特薦之卒不一往蘇東坡與侍從列薦為教授未幾除大學博士後以蘇氏私黨罷移潁州又換彭澤以母憂不仕者四年元符間除秘書省正字

郊寒甚其妻于僚壻借副裘蓋

熙豐黨也竟不衣

卒初學于曾後見黃魯直詩格律一變魯直謂其讀書如禹之治水知天下之脈絡有開有塞至于九川滌源四海會同者作文知古人關鍵其詩深得老杜之法今之詩人不能當也任淵謂讀後山詩似參曹洞禪不犯王位切忌死語非冥搜旁引莫

後山言金
窺其用意深處因爲作註蓋法嚴而力勁學瞻而用變
涪翁以後殆難與敵也

妾薄命二首

自注曰爲曾南豐作

主家十二樓一身當三千古來妾薄命事主不盡年起舞
爲主壽相送南陽阡忍着主衣裳爲人作春妍有聲當徹
天有淚當徹泉死者恐無知妾身長自憐
葉落風不起山空花自紅捐世不待老惠妾無其終一死
尚可忍百歲何當窮天地豈不寬妾身自不容死者如有
知殺身以相從向來歌舞地夜雨鳴寒葢

送外舅郭大夫槩西川提刑

丈人東南來復作西南去連年萬里別更覺貧賤苦王事
有期程親年當喜懼良與妻子別已復迫曛暮何者最可
憐兒生未知父盜賊非人情蠻夷正狼顧功名何用多莫
作分外慮萬里早歸來九折慎馳騫嫁女不離家生男已
當戶曲逆老不侯知人必豈誤

送內

鹿麕顧其子燕雀各自隨與子爲夫婦五年三別離兒女
豈不懷母老妹已笄父子各從母可喜亦可悲關河萬里
道子去何當歸三歲不可道曰首以爲期百畝未爲多數
口可無饑吞聲不敢盡欲怨當誰歸

別三子

夫婦死同穴父子貧賤雖天下寧有此昔聞今見之母前
三子後視不得追嗟乎胡不仁使我至於斯有女初束
髮已知生離悲枕我不宜起長我從此辭大兒學語言拜

揖未勝衣。喚爺我欲去。此語那可思。小兒襁褓間。抱負有
母慈。汝哭猶在耳。我懷人得知。

寄外舅郭大夫

巴蜀通歸使。妻孥且舊居。淡知報消息。不忍問何如。身健
何妨遠。情親未肯疎。功名欺老病。淚盡數行書。

憶少子

端也早豐下。歲晚未可量。我老不自食。安得如我長。呱呱
棄不子。退省未始忘。吾母亦念我。與爾寧相望。

贈二蘇公

岷峨之山中。巴江桂椒棗。櫨楓柞樟。青金黃玉。玳瑁良獸。
皮鳥羽不足當。異人間出駭四方。嚴王陳李司馬楊。一翁
二季對相望。奇寶橫道驥服箱。誰其識者有歐陽。大科異

等固其常。小却盛之白玉堂。典謨雅頌用所長。度越周漢
登虞唐。千載之下有素王。平陳鄭毛視荒荒。後生不作諸
老亡。文體變化未可量。萬口一律如吃羗。妖狐幻人大陸
梁。虎豹却走逢牛羊。上帝惠顧祓不祥。天門夜下龍虎章。
前驅吳回後炎皇。絳旂丹轂朱冠裳。從以甲冑萬鬼行。乘
風縱燎無留藏。天高地下日月光。授公以柄扶病傷。士如
稻苗待公秧。臨流不度公爲航。如大醫王治膏肓。外證已
解中尚強。探囊一試黃昏湯。一洗十年新學腸。老生塞口
不敢嘗。向來狂殺今尚狂。請公別試囊中方。

送江端禮

正學元非世。能詩新有聲。諸公交鄭泰。多士閉何生。汎愛
經過數。移書底裏傾。又爲淮海別。病眼向誰明。

九日寄秦觀

疾風回雨水明霞沙步叢祠欲莫鴉九日清樽欺白髮十年爲客負黃花登高懷遠心如在向老逢辰意有加淮海少年天下士可能無地落烏紗

示三子

去遠卽相忘歸近不可忍兒女已在眼眉目略不省極喜不得語淚盡方一哂了知不是夢忽忽心未穩

烏呼行

去年米賤家賜粟百萬官倉不餘掬青錢隨賜費追呼昔日剜瘡今補肉今年夏旱秋水生江淮轉粟千里行不應遠水救近渴空倉四壁雀不鳴聞爲政不爲費兩不相傷兩相濟十年斂積用一朝驚濤破山風動地

送張支使

曠度逢知晚高才處下難清秋一鶚上拭目萬人看白酒初同醉黃花已戒寒憑將衰老事一一報長安

從蘇公登後樓

倏作三年別才堪一解顏樓孤帶清洛林缺見巴山五月池無水千年鶴自還白鷗沒浩蕩愛惜鬢毛斑

次韻李節推九日登南山

平林廣野騎臺荒山寺鳴鐘報夕陽人事自生今日意寒花只作去年香巾欵更覺霜侵鬢語妙何妨石作腸落木無邊江不盡此身此日更須忙

田家

鷄鳴人當行犬鳴人當歸秋來公事急出處不待時昨夜

三尺雨。竈下已生泥。人言田家樂。爾苦人得知。

出清口

家世山東飽耕稼。晚託一舟順流下。漁溝寒餅不下筋。推
拖轉頭更五夜。平明放溜出清口。霜落潮回霧連野。平淮
一夢三十里。有日無風神所借。似憐憂患滿人間。百孔千
瘡容一罅。文章末技將自効。語不驚人神可嚇。子女玉帛
君所餘。寄聲白鳥煩多謝。

贈歐陽叔弼

早知汝穎多能事。晚以詩書託下僚。大府禮容寬懶慢。故
家文物尚嫖姚。只將憂患供談笑。敢望功言答聖朝。歲歷
四三仍此地。家餘五一見今朝。

觀文忠公家六一堂圖書

生世何用早。我已後此翁。頗識門下士。略已聞其風。中年
見二子。已復歲一終。呼我過其廬。所得非所蒙。先朝羣玉
殿。冠佩環羣公。神文煥王度。喜色見天容。御榻誰復登。帝
書元自工。黃絹兩大字。一覽涕無從。似欲託其子。天意人
與同。歷數况有歸。敢有貪天功。集古一千卷。明明並羣雄。
誰爲第一手。未有百世公。廟器刻科斗。寶樽蟠華蟲。緬懷
弁服士。酬獻鳴琤琮。插架一萬軸。遺子以固窮。素琴久絕
弦。碁酒頗闕供。向來一瓣香。敬爲曾南豐。世雖嫡孫行。名
在亞子中。斯人日已遠。千歲幸一逢。吾老不可待。露草濕
寒蜚。

送蘇迨

胷中歷歷着千年。筆下源源赴百川。真字飄揚今有種。清

談絕倒古無傳出塵解悟多爲路隨世功名小着鞭白首
相逢恐無日幾時書札到林泉

送黃生兼寄二謝

城西兩謝俱能文穰丞精悍吾所聞每讀吾詩得人意使
不能文已可人我昔謝公門下士早年妄作功名意如今
老寄潁河東九泉雖深愧此公

次韻蘇公西湖徙魚三首

窮秋積雨不破塊霜落西湖露沙背大魚泥蟠小魚樂高
丘覆杯水如帶魚窮不作搖尾憐公寧忍口不忍鱗脩鱗
失水玉參差晚日搖光金破碎咫尺波濤有生死安知平
陸無灘瀨此身寧供刀几用着意更須風雨外是間相忘
不爲小濠上之意誰得會枯魚雖泣悔可及莫待西江與

東海

赤手取魚如拾塊布網鳴舷攻腹背豈知激濁與清流恐
懼駢頭牽翠帶居士仁心到魚鳥會有微生化餘鱸寧容
網目漏吞舟誰能烹鮮作苛碎我亦江湖釣竿手悞逐輕
車從下瀨生當得意落鷗邊何用封侯墮鳶外不如此魚
今得所置身暗與神明會徑須作記戒鯨鯢防有任公釣

東海

詩成落筆驥歷塊不用安西題紙背小家厚劔四壁立拆
東補西裳作帶堂下殼鯨牛何罪太山之陽人作鱠同生
異趣有如此併懸毫間終一碎流水長者今公是雨花散
亂投金瀨人言充庖須此輩慈觀更須容度外賜墻及肩
人得視公才粲粲一都會有憐其窮與不朽我亦牽聯書

玉海

八月十日二首

一夢人間四十年，只應炊竈固依然。兩官不辦一丘費，五字虛隨萬里船。

人生七十今強半，老去光陰已後身。更欲置身須世外，世間元自不關人。

迎新將至漕城

早投林野違風雨，晚傍塵沙飽送迎。却愧兩街屠販子，卧聽車馬過橋聲。

卽事

老覺山林可避人，正須麋鹿與同羣。却嫌鳥語猶多事，強管陰晴報客聞。

齋居

青奴白牯靜相宜，老罷形骸不自持。一枕西窗淡閉閣，卧聽叢竹雨來時。

寄亳州林侍制

湖海相望闕寄聲，雲林過雨未全晴。青衫作吏非前日，白首論文笑後生。似聽兒童迎五馬，稍修書札問專城。一聞苦李蒙莊句，不復人間世後名。

次韻回山人

一杯領意不須沽，六字持身已有餘。痴子未知天上樂，先生今解世間書。

又次屬沈東老

隨世功名非所望，稱家豐儉不求餘。青衫出指論奇字，白

髮挑燈寫細書

送孝忠二首

老眼元多淚。春風見此行。又爲貧賤別。更覺急難情。斗食吾堪老。詞場爾向榮。未須憐野鴛。家法付宣城。經史三年學。聰明一旦開。把文甘潦倒。數日待歸來。士患聲名早。官今歲月催。有親須薄祿。臨路尚徘徊。

以桂

桂一作桂。杖供仁山主。

洗足投筇只坐禪。厭尋岐路費行纏。老來不復人間事。不用山公更削圓。

西湖

小徑才容足。寒花只自香。官池下鳧鴈。荒塚上牛羊。有子吾甘老。無家去未量。三年哦五字。草木借輝光。

送吳先生謁惠州蘇副使

聞名欣識面。異好有同功。我亦慚吾子。人誰恕此公。百年雙白鬢。萬里一秋風。爲說任安在。依然一秃翁。

別觀音山主

離合應生理。過逢豈近緣。情親見今日。語妙記當年。閉戶安禪主。衝風逆水船。不應清夜月。故作別時圓。

離頌

河市千人聚。寒江百尺牽。吾生能幾日。此地費三年。叢竹防供爨。池魚已割鮮。拙勤終不補。他日愧無傳。

答晁以道

轉走東南復帝城。故人相見眼偏明。十年作吏仍餬口。兩地爲鄰闕寄聲。冷眼尚堪看細字。白頭寧復要時名。孰知

范叔寒如此未覺嚴公有故情

別黃徐州

姓名曾落薦書中刻畫無鹽自不工一日虛聲滿天下十年從事得途窮白頭未覺功名晚青眼常蒙今昔同衰疾又為今日別數行老淚灑西風

古墨行 并序

晁無斃有李墨半丸云裕陵故物也往於秦少游家見李墨不為文理質如金石亦裕陵所賜王平甫所藏者潘谷見之再拜云真廷珪所作也世惟王四學士有之與此為二矣嗟乎世不乏奇乏識者耳敬為長句率無斃同作

秦郎百好俱第一烏烏一作墨丸如漆姿如石巧作松身與鏡

面借美於外非良質潘翁拜跪摩老眼一生再見三歎息了知至鑿無遁形王家舊物秦家得君今所有亦其亞伯仲小低猶子姪黃金白壁孰不有古錦句囊聊可敵睿思殿裏春夜半燈火闌殘歌舞散自書細字答邊臣萬里風塵入長算初聞橋山送弓劍寧知玉盃人間見夜光炎炎衝斗牛會有太史占星變人生尤物不必有時一過目驚老醜念子何忍遽磨研少待須臾圖不朽魏衍注曰少游之墨嘗許先生為他日墓誌此詩時少游尚無恙然終先逝去潤筆先生嘗語衍作明窗淨几風日暖有愁萬斛才八斗徑須脫帽管城公小試玉堂揮翰手

次韻春懷

老形已具臂膝痛春事無多櫻笋來敗絮不溫生蟻蝨大杯覆酒着塵埃衰年此日常為客舊國當時只廢臺河嶺

尚堪供極目。少年爲句未須哀。

河上

背水連漁屋。橫河架石梁。窺巢烏鵲競。過雨艾蒿光。鳥語催春事。窗明報夕陽。還家慰兒女。歸路不應長。

題柱并序

永安驛廊東柱有女子題五字云無人解妾心。日夜長如醉妾不是瓊奴。意與瓊奴類。讀而哀之作二絕句。

桃李催殘風雨春。天孫河鼓隔天津。主恩不與妍華盡。何限人間失意人。

從昔嬋娟多命薄。如今歌舞更能詩。孰如如一作知文雅河陽。

令不削瓊奴柱下題。書此卷末。其亞前

蠅虎

物微趣下世不數。隨力捕生得稱虎。匿形注目搖兩股。卒然一擊勢莫禦。十中失一八九取。吻間流血腹如鼓。却行奮臂吾甚武。明日淮南作端午。

宿溪明閣

窈窕溪明閣。晴寒是去年。老將災疾至。人與歲時遷。默坐元如在。孤燈共不眠。莫年身萬里。賴有故人憐。縹緲金華伯。人間第一人。劇談連晝夜。應俗費精神。時要平安報。反愁消息真。真墻根霜下草。又作一番新。

東山謁外大父墓

土山宛轉屈蒼龍。下有槃槃蓋世翁。萬木剝天元自直。叢篁侵道更須東。百年富貴今誰見。一代功名託至公。少日拊頭期類我。莫年垂淚向西風。

次韻晁無斁冬夜見寄

寒窗冷硯欲生塵。短枕長衾却自親。老子形骸從薄暮。先
生意氣尚青春。覆杯不待回丹頰。危坐猶能作直身。城郭
山林兩無得。莫年當復幾霑巾。

寒夜有懷晁無斁

同好共城郭。十日不一顧。人事雖好乖。吾生亦多忤。闔門
對妻子。歲月不可度。閉目寧用遮。停杯仍下筯。獨無區中
緣。永懷岩下趣。平生三徑資。安得一朝具。萬里初歷塊。前
驅告曛暮。歸懷屬有思。棄世不待怒。老境厭透遲。人情費
將護。向來張長公。吾亦從茲去。燈花頻作喜。月色正可步。
預恐何水曹。明朝有新句。

寄提刑李學士

石渠金馬青雲上。東里西門濟水邊。上冢過家真樂事。平
時持節貴當年。成家舊學諸儒問。脫手新詩萬口傳。范叔
一寒今若此。相逢猶得故人憐。

寄杜擇之

杜寄惠近詩

詩家兩杜昔無隣。文采風流一作傳家世有人。疾置送詩驚老
醜。坐曹得句自清新。興來不假江山助。目過渾如草木春。
農馬智專吾不讓。衡陽紙貴子能頻。

寄晁無斁

稍聽春鳥語丁寧。又見官池出斷冰。雪後踏青誰與共。花
間着語老猶能。笑談莫倦尋常聽。山院終同一再登。今日
已知他日恨。槍榆况得及飛騰。

還里

曠士愛吾廬。遊子悲故鄉。慷慨四方志。老衰但悲傷。虛名自成誤。失得略相當。莫年還家樂。未覺道路長。問里喜我來。車馬塞康莊。爭前借言色。草木亦晶光。向來千人聚。一老獨徜徉。手開南陽阡。松栢鬱蒼蒼。永願守一丘。脫身萬里航。平生功名念。倒海沈我腸。款段引下澤。斷弦更空觴。尚恐北山南。有文移路傍。

次韻夏日江村

漏屋簷生菌。臨江樹作門。捲簾通燕子。織竹護鷄孫。向夕微風一作涼涼。進相逢。故意存。一作需衣何當加我歲。從子問乾坤。

次韻夏日

江上雙峰一草堂。門開心靜自清涼。詩書發冢功名薄。麋

鹿同羣歲月長。句裏江山隨指顧。舌端幽眇致張皇。莫欺九尺鬚眉白。解醉佳人錦瑟傍。

夏夜有懷

卧念張居士。逃名老石根。學詩端得瘦。識字卽空樽。鳴笛夜宜遠。燈花曉更繁。未須哀老子。也復守丘園。

和顏生同遊南山

竹杖芒鞋取次行。琳琅觸目路人驚。當年此日仍爲客。病目今來喜再明。筋力尚堪供是事。登臨那得總無情。已知名世徒爲爾。可復緣渠大瘦生。

和魏衍元夜同登黃樓

車馬競清夜。人物秀三楚。登臨得免俗。茲樓豈時睹。同來兩稚子。冠者亦四五。落落俱可人。頗亦厭歌鼓。山月出未

後山言金
十一
高潛鱗動寒渚。檣燈接稀星。奪目粲不數。魏侯轉物手。百
好趨就叙。得句未肯吐。秀氣出眉宇。水淨納行影。山空答
脩語。夜氣稍侵肌。鳥駭去其侶。清游豈有極。喜事戒多取。
投靜未免喧。于今豈非古。永懷寂寞人。南北忘在所。橫嶺
限魚鳥。作書欲誰與。情生文自哀。意動足復行。憑楹一作
共一默。望舒已侵午。

和魏衍同登快哉亭

經時不出此。同臨小徑新。摧草舊侵。欲傷江山看日落。不
堪花鳥已春深。來牛去馬中年眼。朗月清風萬里心。故着
連峰當極目。回看幽徑遶雙林。

和三日

苦遭年少強追陪。病眼看花更覆杯。夾岸萬人傾國出。清

江一注兩山開。遊人欲盡驚鷗下。晚日猶須惡雨催。更恐
明年有離別。折花臨水共徘徊。

登燕子樓

綠暗連村柳。紅明委地花。畫梁初着燕。廢沼已鳴蛙。鷗沒
輕春水。舟橫着淺沙。相逢千歲語。猶說一枝花。

和黃充實春盡遊南山

逐勝缺勇功。餞春無少色。出門欲何向。坂九隨所擊。百年
餘幾何。十步復一息。同來二三子。楚楚頗修飭。行前強老
夫。徑捷疲峻陟。山門開煙霏。禪房閉岑寂。口燥沾茗椀。久
厄此爲德。逐日下西山。草路荒不識。回溪轉鈎曲。門徑入
繩直。故人喜領客。內愧積腸臆。所來爲親舊。掃除稱寥閔。
疾風無末勢。過雨有餘瀝。高花初欲然。平荷已如拭。因君

感衰盛醜好移頃刻交新厭區區話舊聽歷歷談間十一
二四座已傾側茅屋漏一作風風霜山田帶沙磔尚能哀此
老舉手觸四塞君如澗底松超拔出天壁學詩有新功黃
魏共推激生與魏衍黃預游

何郎中出示黃公草書

龍蛇起伏筆無前江漢淵回語更妍好事元須一賞足藏
家不必萬人傳
當年闕里與論詩晚歲江山斷夢思妙手不為平世用高
懷猶有故人知

送河間呂令子固甥

今日中年令當年太守孫獨能憐此老官避席為門寒日
風濤壯邊城簿領繁平生子曾子白首得重論

寄潭州張芸叟

湖嶺一都會西南更上游秋盤堆鴨脚春味薦猫頭宣室
來何暮蒸池得借一作借留孰知為郡樂莫作越鄉憂
去國如前日為邦得舊游霜柑先落手春鴈幾回頭只道
風沙惡寧知賈宋留賦詩真有助弔古不同憂

雪後

送往開新雪又晴故留臘白待春青稍回松色伸梅怨併
得朝看與夜聽已覺庭泥生馬一作身迹遽修田事帶朝星
莫年功力歸持律不是騷人故獨醒

送提刑李學士移使東路

襟抱從前相向開倡酬于此未多陪身更寵辱談彌勝路
別東西意自哀隱几忘言終不近白頭青簡兩相催孰知

後山詩集
衰老難為別。聲問應須續續來。

隱者郊居

高齋繚繞度雙溝。老氣軒昂蓋九州。不為江山開悒快。正緣風味得淹留。招攜好客共談笑。拆補新詩擬獻酬。小摘自鋤稀菜甲。旁觀虛作不堪憂。

送檢法趙奉議

三歲公門不屢過。作賤時得問如何。及茲去去翻為恨。向使常常官謂多。勇銳閉房猶着酒。切淡疾惡反傷和。贈言竊取仁人號。善聽君居長者科。

寄曹州晁大夫

東方千騎貴當年。白髮居頭也自賢。官費精神修客主。稍回功譽入章篇。虛名不救一作空腸厄。晚歲仍遭末疾纏。

死去不為天下惜。鏡中當有故人憐。

送馮翊朱令

三楚風流信有人。先聲今已徹咸秦。寧為鷄口官無小。欲試牛刀久要新。細肋卧沙勤下筋。長芒刺眼莫霑唇。山西豪傑知吾老。為說猶堪舉萬鈞。

酬智叔見贈

老去斯文不更論。却因夫子話師門。清談不待傾三語。勝日何知共一樽。逐北我方填坎井。圖南誰得料鵬鯤。過逢為說侯芭在。卧楫生衣犢有孫。

敬酬智叔三賜之辱兼戲楊理曹二首

龍爭虎據竟成塵。只有青樓與白門。青樓謂燕令宰才高先得句。使君情重數開樽。江山故國難留鶴。科斗荒池可

後山詩金
可着鯢。直使頰鬚渾作白。未應投鐻愧諸孫。智叔有嘆白髮詩
險韻。屢詞費討論。真持布鼓過雷門。更看九日臺頭句。未
用三人月下樽。鏡裏黃花明白髮。海邊赤脚踏長鯢。從來
相戒莫打鴨。可打鴛鴦最後孫。

酬智叔見戲

百念皆空習尚存。稍修香火踏空門。槌腰摩腹非春事。割
愛投閑覆上樽。白髮情多猶可染。來詩有白髮之嘆 驂鸞興盡却
乘鯢。上界紛紛足官府。也容河鼓過天孫。
雨。花風葉未宜春。私柳官渠白下門。每度清溪嘲短髮。時
容使席近芳樽。雄蜂雌蝶元非偶。野馬遊塵不佐鯢。若許
成功當封賞。事見李待制席上篇 請看子子與孫孫。

九月九日與智叔鵬堂宴集夜歸

鵬堂從昔有惡客。酒盡不去仍復索。欲留歌舞盡客意。風
雨和更作三厄。佳辰難得客更難。我窮無酒爲君歡。只欲
泥行過白下。萬一簾疎見一斑。

絕句四首

秋牀歸卧不緣愁。病與衰謀作老仇。數樹直青能爾瘦。一
軒殘照爲誰留。
芒鞋竹杖最關身。散髮披衣不待人。三兩作鄰堪共話。五
千插架未爲貧。
昏昏嗜睡元非病。續續題詩不耐閑。作意買山還得笑。多
方拔白却成斑。
書當快意讀易盡。客有可人期不來。世事相違每如此。好
懷百歲幾回開。

懷遠

任淵注云此詩屬東坡

海外三年謫天南萬里行生前只為累身後更須名未有
平安報空懷故舊情斯人有如此無復涕縱橫

答田生

酒亦有何好人今未肯忘苟無愁可解何必醉為鄉
論奇字終能諱秘方直饒肌骨秀正要畫眉長

早起

鄰鷄接響作三鳴殘點連聲殺五更寒氣挾霜侵敗絮賓
鴻將子度微明有家無食惟一作高枕百巧千窮只短檠
翰墨日疎身日遠世間安得尚虛名

和黃充小雪

度臘侵春亦未遲紛紛款款意猶微露衣帶潤元無見着

物還消不待晞臍欲打聽連夜聽未須迷鴈斷行飛老來
才盡無新語只欲煩君急手揮帶潤一作自濕

謝趙使君送烏薪

欲落未落雪近人將盡不盡冬壓春風枝冰瓦有去鳥遠
坊窮巷無來人忽聞叩門聲遽速驚鷄透籬犬升屋使君
傳教賜薪炭妓圍那解思寒谷老身曲直不足云冷窓凍
壁作春溫定知和氣家家到不獨先生雪塞門一作席作門

和范教授同遊桓山

送客尋山已自仙行談坐笑復忘年平郊走馬斜陽裏破
屋傳杯積水邊洗壁留名題歲月一作題名登高着句記
山川風流幕下諸公子縮手吟邊更覺賢

早春

度臘不成雪迎年遠得春水開還舊綠魚喜躍脩鱗柳及
年年發愁隨日日新老懷吾自異不是故違人

徐僊書

徐清字靜之蓬萊女官也下西里王氏詩作謝體書效
黃魯直妍妙可喜敬作三絕句

蓬壺仙子補天手筆妙詩清萬世功官學黃家元祐脚信
知人厄匪天窮

詩成已作客兒語筆下還爲魯直書豈是神仙未賢聖不
隨時事向人疎

金華牧羊小家子西真攘桃何代兒詩着海山書落爪向
來何一作那免世人疑

咸平讀書堂

昔人三百篇善世已有餘後生守章句不足供囁嚅一登
吏部選筆硯隨掃除閉閣畫眉嬾隔屋聞歌呼奉公用漢
律寧復要詩書俛首出跨下枉此七尺軀今代陶朱公不
作大梁屠計然特未用意得輕全吳爲邦得畿縣政密自
計疎寧書下下考不奉急急符用意簿領外築室課典謨
平生五千卷還舍不問塗近事更漢唐稍以詩自娛復作
無事飲醉卧擁青奴桃李春事繁軒窓晝景舒鳴屋鳩渴
雨窺簾燕哺雛休吏散篇帙風篁獻笙竽所然一啓齒斯
民免爲魚

絕句二首

里中餽杏得嘗新馬上逢花始見春勤苦著書如此吏世
間枉是最閑人

密密丹房疊疊花。一枝臨路爲人斜。丁寧語鳥傳春意。白
下門東第幾家。

春懷示鄰里

斷牆着雨蝸成字。老屋無僧燕作家。剩欲出門追語笑。却
嫌歸鬢着塵沙。風翻蛛網開三面。雷動蜂窠趁兩衙。屢失
南鄰春事約。只今容有未開花。

和寇十一晚登白門

重門傑觀屹相望。表裏山河自一方。小市張燈歸意動。輕
衫當戶晚風長。孤臣白首逢新政。遊子青春見故鄉。富貴
本非吾輩事。江湖安得更相忘。

謝寇十一惠端硯

百工營才先利器。市道居貨如作贄。書生生活計亦酸。寒斷

塶半瓦寧求備。端溪四山下龍淵。鬱積中州清淑氣。金聲
玉骨石爲容。河江屈流雲作使。滑如女膚色。馬肝夜半神
光際。天地諸天散花百神喜。知有聖人當出世。沒人投澗
索。千丈探領適遭龍伯睡。輾轡挽出萬人負。千歲之藏一
朝致。琢爲時樣供翰墨。十襲包藏百金貴。北行萬里更衆
目。寇卿好事不計費。南鄰居士卿之孫。豐悴相從不爲異。
似憐陶瓦磨竈煤。輟誦不減前人志。人言寒士莫作事。鬼
奪客偷天破碎龜。玉輻匱與無同。錦衾還客棄。佳惠衆所
欲。得當有緣天獨於。余可無意敢書細。字注魚蟲要傳華
嚴八千偈。

再和寇十一

與世相違孰自量。資身無策謾多方。逢場作戲真呈拙。誤

筆成蠅豈所長名字不歸青史筆形容終老白雲鄉何作
可須五斗輕千里賴有斯人未肯忘

謝趙生惠芍藥

從微至老走風塵喜見鄉園第四春獨舞東風醉西子政
緣無語却宜人

九十風光次第分天憐獨得殿殘春一枝賸欲簪雙鬢未
有人間第一人

寄鄰

借子翩翩果下駒春原隨處小踟躕可能炙背春風裏卧
把青銅摘領鬚

和寇十一同登寺山

度暑無好懷憑危略幽致衣冠蔚如林從我才一二茲山
昔溪登歲月誰得記尚有名勝流不與金石悴孰知千載
後我與子復至煙昏倏見燈洪發疑無地領略章句手割
據英雄志與壞容一瞬今昔當幾喟圍山缺西北放目不
可制歸懷納清境夜榻成良寐零落壁間詩豈特彼所愧
會逢南過適不問西來意

謝孫奉職惠胡德墨

奚李風流盡法傳外諸孫常山陳瞻子懷抱自高擗孰云
勝潘翁惟眉山公言四海未盡識一變歸九原胡郎少年
子外家典刑存一點落髹漆重價壓璣璠孫侯磊落人情
義久益惇解囊贈玄圭孰知師白猿我資不解書下筆輒
自暖良寶不受辱隱默面稱寬

拱翠堂

蕭邑富人竇敦禮即泉山作此堂規制宏麗
無答作記

千年茅竹蔽幽奇。一日堂成四海知。便有文公來作記。尚須我輩與題詩。至人但有經行處。寶蓋仍存朽老枝。能事向來非促迫。經年安得便嫌遲。

和李使君九日登戲馬臺

登高能賦屬吾儕。不用傳杯擊鉢催。九日風光堪落帽。中年懷抱更登臺。江山信美因人勝。黃菊逢辰滿意開。二謝風流今復見。千年留句待公來。

與魏衍寇國寶田從先二姪分韻得坐字

將老蒙誤恩。受吊不受賀。欲起尚遲回。積閑習成惰。向來二三子。相與守寒餓。一日不可無。三歲安得過。是時秋益高。夜永月初墮。漏鼓已再更。坐者餘幾箇。酒薄多可強。談勝堅莫破。簷昏讀字細。林缺瞻星大。吳吟未至慢。楚語不

假些。懷遠已屢歎。論昔先急睡。身世喜相違。真成螿旋磨。平生陳孟公。晚歲不驚坐。

初破莫破一作莫樓

和黃生出游

賸欲登臨強作歡。衣冠未動意先闌。從今泉石非吾事。只借君詩細細看。

從寇生求茶庫紙

南朝官紙女兒膚。玉版雲英比不如。乞與此翁元不稱。他年留待大蘇書。

酬顏生惠茶庫紙

破卵剝膜肌理滑。削玉作版光氣熏。老子尚堪哦七字。阿買頗能書八分。

黃樓

樓以風流勝。情緣貴賤移。屏亡老畢篆。市發大蘇碑。更覺江山好。難忘父老思。只應千載後。覽古勝當時。

答黃生魏衍注云時初冬尚無冬衣先生以背子贈之堅不受到家以朱氏所贖二疋寄之因作詩

我無置錐君立壁。春黍作糜甘勝蜜。綈袍不受故人意。樂餌官爲兒輩屈。割白鷺股何足難。食鷓鴣肉未爲失。暮年五斗得千里。有愧寒簷背朝日。

五子相送至湖陵

中年患別多。作別早日諱。窮常得窮勿。云一水四十里。衣冠塞郭何人同。周生子病輟身出。劉子遠來今幾日。石家仲叔好少年。頗能壓俗從吾律。魏君不獨相從早。自君之來。吾却掃歲月。磨人孰能久。反覆看渠難得好。湖陵古城

風日寒情義。乃知生別難。高懷已爲故人盡。交道應留後代看。

家山晚立

遶舍苔衣積。倚墻梨頰紅。地平宜落日。野曠自多風。禹迹千年後。家山一顧中。未休嗤土偶。已復逐飄蓬。

寒夜

一夜風澎浪。中宵月脫雲。到窓資少睡。遠響倦多聞。星火遠相亂。江山氣不分。早鷄先得便。斷鴈屢鳴羣。

山口

重霧真成雨。疎簾不隔風。青林擁紅樹。家鷺雜賓鴻。漁屋渾環水。晴湖半落東。往來成一老。猶在半塗中。

宿合清口

後山詩集 卷二十一
風葉初疑雨晴窓誤作明穿林出去鳥舉棹有來聲
魚猶得寒沙鴈自驚卧家還就道自計豈蒼生

宿泊口

弱柳經寒色懸流盡夜聲更長疑睡少霜落怯寒生急急
占星度搖搖苦舫傾風濤兼盜賊恩重覺身輕

宿柴城

卧埋塵葉走風煙齒豁頭童不計年起倒不供聊應俗高
低莫可只隨緣通通遠鼓三行夜隱隱平湖四接天枕底
濤波篷上雨故將羈旅老一作到愁邊

晚坐

柳弱留春色梅寒讓雪花溪明數積石月過戀平沙病減
還增藥年侵却累家後歸栖未定不但只昏鴉

寒夜

留滯常思動艱虞却悔來寒燈挑不焰殘火撥成灰凍水
滴還歇風簾掩復開熟知文有忌情至自生哀

晚興

去國猶能別逢人始欲愁不干遮極目自是怯回頭布網
收魚慘連筒下釣鈎誰初教鮮食澤竭未能休

別劉郎

魏衍注云宣義之婿六年之別先生喪母劉
喪父故其詩哀甚

一別已六載相逢有餘哀公私兩多事災病百相催無酒
與君別有懷向誰開溪知百里遠官爲老夫來

鷄籠鎮

今棧州界

河市新經集鷄籠舊得名初聞北人語意作故鄉聲客久
艱難極情忘去就輕空虛仍癢忘何以慰諸生

酬王立之二首

頓有亭前玉色梅。情知不宥破寒開。似憐憔悴兩公指蘇黃

客。獨倚東風遣信來。重梅雙杏巧相將。不為游人只自芳。應怪詩翁非老手。相逢不作舊時香。

和謝公定觀秘閣文與可枯木

斯人不復有。累世或可期。每於丹青裏。一見如平時。壞障塵得入。慘淡令人悲。墨色落欲盡。嚴顏終不移。朽老莫使年。石心烏銅皮。念此猶少作。未盡水霞姿。北枝把異鵲。意定了不疑。惜哉不得語。習次幾興衰。一為要貴役。可復愧一作畫師。隱奧雖可惜。塗抹復見遺。謝侯名家子。感慨形苦詞。豈惟語畫工。勁特頗似之。何當補諫列。一吐胸中奇。

贈吳氏兄弟

得失媿妍只自知。略容千載有心期。恨君不見金華伯。何處如今更有詩。

上晁主客

時與無咎對酒及門而關者辭焉

兩疏父子共含香。不獨家榮國有光。賸欲展懷因問疾。孰知相對只銜觴。年侵身要兼人健。節近花須滿意黃。從昔竹林須小阮。只今未可棄山王。

贈石先生

多方作計老如期。百疾交攻遽得衰。晚有勝緣逢異士。生須快意闕前知。迫人鬢領紛紛白。臨事迴迂種種遲。分我刀圭容不死。他年鶴馭得追隨。

送歐陽叔弼知蔡州

穎陰爲別悔忽忽。十載相望信不通。晚遇聖朝收放逸。旋遭官禁限西東。又爲太守專淮右。賸喜郎君類若翁。梅柳作新詩興動。可令千里不同風。

送晁堯民守徐

中年爲別不堪憂。東髮登門到白頭。南省望郎仍國士。東方千騎更吾州。彭翁老壽終遺骨。燕子飛來只故樓。知己難逢身易老。煩公置醴我歸休。

山口阻風

夕風朝未回來雲。去爲雨繫舟直山口。天意遽如許。濤風兩方鬪。丘原莫當怒。兩山爲俯仰。一鳥不得度。臨深負高枕。偷生寧得所。歷歷數過帆。當途氣如虎。快意亦適然。淹泊豈吾取。溯洄更去留。未易相爾汝。行登東山顛。壯觀前

來觀九澤。不滿眼五丈方。一罅茲山昔誰遊。巨野傳自古。菰魚無凶年。末利猶不禦。荷噉活萬人。黎埒視千戶。東方富絲麻。小市藏百賈。連檣自南北。行談雜秦楚。向晚風力微。湖清魚可數。空倉鳥鳥樂。外舍窗扉語。身非天下惜。家無十金聚。欲留盜賊迫。欲去渡濤怒。兩者爾何從。一死吾未與。

嘲無咎文潛 二首

詩人要瘦君則肥。便然偉觀詩不宜。詩亦於人不相累。黃金九鑲腰十圍。

一饑緣我不緣渠。身作賈孟行詩圖。窮人乃工君未可。早據要路安肩輿。

次韻夜雨

暗雨來何急。寒房客自醒。驟看燈閃閃。擬對竹青青。聲到江干靜。風回葉上聽。更長那得曉。欹側想儀型。

和王子安至日

近節翻多事。爲家不亦難。老成須藥力。愁絕向誰寬。凍雨能妨夢。朝霜故作寒。衰顏心自了。不待鏡中看。物理有終極。人情從往還。陰陽消長際。老疾去留間。申白徒懷惠。巢由不買山。更歌吾和汝。風日稍侵顏。晨起公私迫。昏歸鳥雀催。百年忙裏盡。萬事醉間來。竹雨深宜晚。江梅半欲開。風燈挑不焰。寒火撥成灰。

連日大雪。以疾作不出。聞蘇公與德麟同登女郎臺。掠地衝風敵萬人。蔽天密雪幾微塵。漫山塞壑疑無地。投隙穿帷巧致身。晚積讀書今已老。閉門高卧不緣貧。遙知

更上湖邊幸。一笑潛回萬室春。

是日賜紫朱

立春

馬蹄殘雪未成塵。梅子梢頭已着春。巧勝向人真奈老。衰顏從俗不宜新。高門官送青絲菜。下里誰思白髮人。共學少年天下士。獨能濡濕轍中鱗。

次韻敬酬元弼三兄

冥冥雨力及時來。冉冉春光作意回。白髮尚堪供語笑。青衫不惜着風埃。林廬要自家家到。尊酒寧辭日日開。只恐未便文字飲。人間無夢到陽臺。

除夜對酒贈少章

歲晚身何託。燈前客未空。半生憂患裏。一夢有無中。髮短愁催白。顏衰酒借紅。我歌君起舞。潦倒略相同。

後山詩集 二十六
贈知命

黑頭居士元方弟。不官作公稱法嗣。外人怪笑那得知。他日靈山親授記。學詩初學杜少陵。學書不學王右軍。黃塵扶杖笑鄰女。白衫騎驢驚市人。靜中作業此何因。醉裏逃禪却甚真。顧我無錢呼畢曜。有人載酒尋子雲。君家魯直不解事。愛作文章可人意。一人可以窮一家。怪君又以才爲累。請將飲酒換吟詩。酒不窮人能引睡。不須無事與多愁。老不欲醒惟欲醉。

謝傅監

好士如好色。昔聞今則無。平生席爲門。未識長者車。曠士慕林谷。羈人辱泥塗。願爲執鞭役。莫順下風趨。去年辱公先。懷刺留寓居。我往拜其門。鸞鷲鳴高梧。論交不計年。取材忘其愚。一寒我如此。百鎰公無餘。今年賀公歸。乃復過我廬。當使有近行。磨門有長須。小家不耐事。鷄飛犬升閭。莫歸自有恨。親顏一何娛。汝家吾無憂。能致賢大夫。吳公漢庭右。賈生世用疎。平分大倉粟。盡讀鄴侯書。士爲知己留。不爲食有魚。三言移曾母。投杼公何如。

次韻答秦少章

學詩如學仙。時至骨自換。縹緲鴻鵠上。衆目焉能玩。子從淮海來。一喙當百難。師儒有韓孟。拭目互驚惋。老生時在傍。縮手愧顏汗。黃公金華伯。莞爾同一眄。彼方試子難。疾前不應懦。要當攻石堅。勿作搏沙散。植壁雖具美。礧錯加璀璨。我老不足畏。後生何可慢。

九月十三日出善利門

十載都城客。孤身冒百艱。一饑非死所。萬里有生還。去國
吾何意。歸田病不關。共看霜白鬢。似得半生閒。

湖上晚歸寄詩友

鬢髮難藏老。湖山穩寄身。却尋方外士。招作社中人。霜葉
淡於染。秋花晚自春。無人還有礙。詩卷莫辭頻。
簑笠宜多病。衣冠錯致身。清愁偏待客。白髮解禁人。江月
淡留雪。山梅借探春。興從湖上發。詩爲道人頻。
功名違壯志。戒律負前身。劉德長欺客。王融却笑人。殘年
憎送歲。病眼怯逢春。杖屨知何向。如君未厭頻。
紅綠羞明眼。欹斜久病身。年齡不待命。湖海却留人。點滴
花間露。新鮮柳上春。情懷將底用。詩外不須頻。

寄邢和叔

昔作梁宋遊。幽憂廢朝昏。閉門無往還。不厭兒女喧。隔牆
聞剝啄。莫夜誰叩門。知是邢夫子。低回過高軒。願爲布衣
交。不顧年德尊。忽忽立談罷。又見東南奔。江湖多病後。僅
免餉魚鼈。久廢數行書。因人問寒暄。但愛孤山西。松筠數
家村。便欲築居室。插秧仍灌園。生前不自愛。身後何足論。
草玄笑楊雄。贊易悲虞翻。文章徒自苦。紙筆莫更存。却尋
南郭老。隱几學忘言。他日宦遊客。誤入桃花源。葦間見漁
父。誰識王侯孫。

十七日觀潮

潮頭初出海門山。千里平沙轉面間。猶有江神憐北客。欲
將奇觀破衰顏。

江水悠悠自在流。向人無恨一作不應愁。相逢不覺渾相

似誰使清波早白頭

宿錢塘尉廨

平湖遶舍山無盜官事長閑俸有金安得終身為禦寇不
辭兒女作吳音

贈關彥長

少年初識字已誦子虛賦嘗疑天上人已離人間去蹉跎
二十年久自歎遲暮倦游梁宋間却踏江湖路此地始逢
君秋陽破朝霧白首鬢毛新青衫顏色故問君胡為然竟
坐文字誤人事久難知高才常不遇論人較賢智富貴寧
在數不見竹林詩山王俱不與湖塘發高興山林有佳處
迨此閒暇時觀遊莫辭屢功名如附贅得失何用顧但當
勤秉燭長願隨杖屨

贈太素 軻律師

山居不出十四年矣

林間細路暗通門火閣深藏雪裏春自笑世間千計錯美
他湖上十年人

次韻關子容湖上晚飲

風樹吹花落四鄰莫雲將雨作催人旋傾美酒留連客急
作新詩報答春試徬清湖看鬢髮莫辭行樂費金銀如今
歸去還高臥更問風光有幾旬

夏日書事

花絮隨風盡歡娛過眼空窮多詩有債愁極酒無功家在
斜陽下人歸滿月中肝腸渾欲破魂夢更無窮

石無咎書苑

卒行無好步事忙不草書能事莫促迫快手多麓疎君看

荷葦擲葉扇。崔家中叔三人俱。掃除事物費歲月。收完神氣忘形軀。恍然有得奪天巧。衰顏生態能相如。市師信手無贏餘。一日畫出東封圖。眼前百口怪神速。背後十指爭柳榆。君家畫苑傾東都。錦囊玉軸行盈車。補完破碎收亡逋。欲得不計有與無。問君此病何當祛。君言無事聊自娛。世間何事非迷途。挾策未必賢。樛蒲苑中最愛文。與蘇情親不獨生。同間自謂知子誰。知余叔也不疑。回不愚。憐君用意常勤渠。揮毫灑墨填空虛。風梢雨葉出新意。老樹僵立何年枯。我生百事不留意。外物不足煩。除翰墨。纔能記名字。模臨寫貌無工夫。見弱不救危。不扶獨無一物充。庖厨看君髮。漆顏丹朱意氣健。如生馬駒逢人。不信六十餘。郁然一莖無白鬚。呂公落翼起釣屠。南山四老東宮須。人生晚達有如此。應笑虞翻早著書。

次韻應物有歎黃樓

一代蘇長公。四海名未已。投荒忘歲月。積毀高城壘。斯樓亦何與。與人壓復起。紛紛徒爾爲。長劍須天倚。循分即可久。吾行誰與止。邇來賢達人。五十笑百里。賴有寇公子。衆毀聞獨美。直氣懾狂童。牽聯皆可紀。少公作長句。班揚安得擬。頗有喜事人。睥睨欲槌毀。一朝陵谷變。天語含淡旨。驚倒樓前人。今朝有行履。

和休文至自新安

無成底事到天涯。重見春工換柳枝。歷盡江山苦行役。歸來風雨過花時。驅馳其厭人間世。險阻時聞別後詩。獨有窮愁銷未盡。一番相見一伸眉。

次韻蘇公西湖觀月聽琴

公詩端王道。亭亭如紫雲。落世不敢學。謂是詩中君。獨有黃太史。抱杓挹其尊。韻出百家上。誦之心已醺。黃鍾毀少合。大裘擯不文。世事如病耳。螿闕作牛聞。苦懷太史惠。養豹煙雨昏。後世無高學。舉俗愛許渾。

城南

白下官楊小弄黃。騎臺南路綠無央。含紅破白連連好。度水吹香故故長。蹲滑踏青穿馬耳。轉危緣險出羊腸。熟知南杜風流在。預怯排門有斷章。

贈魯直

相逢不用早。論文宜晚歲。平生易諸公。斯人真可畏。見之三伏中。凜凜有寒意。名下今有人。曾中本無事。神物護詩書。星斗見光氣。惜無千人力。負此萬乘器。生前一尊酒。撥棄獨何易。我亦奉齋戒。妻子以爲累。君如雙井茶。衆口願其嘗。顧我如麥飯。猶足填饑腸。陳詩傳筆意。願立弟子行。何以報嘉惠。江湖永相忘。

放歌行二首

春風永巷閉娉婷。長使青樓誤得名。不惜捲簾通一顧。怕君着眼未分明。當年不嫁惜娉婷。抹白施朱作後生。說與傷人須早計。隨宜梳洗莫傾城。

送李奉議亳州判官

吾友孫子實。愛學吾所畏。持身如處子。得句有餘味。交驩艱難際。凜然見名誼。吾病卧里中。車馬日一至。遣醫饋梁

肉。憂喜見顏際。殷勤勸加餐。代我破戒罪。一別已三秋。君
室乃其季。輪囷見眼中。不作千里外。因聲問何如。胡不枉
一字。

吾友張文潛。君行乃其里。當年釣遊處。壯者或可指。聞風
起遐想。意作千古士。不知塵土中。奴推婢不齒。胷中無一
塵。筆下有百紙。勿問見自知。未語君已喜。與遊今已後。行
已勿停軌。

陳詢秀才歸徐

千里相從愧子心。未堪歸路馬駸駸。更能作意憐衰病。官
復一作後重來道古今。三歲有期看一舉。百年聊待到千尋。
行逢淨社論餘習。爲說登臨久廢吟。

登彭祖樓

城上危樓江上城。風流千載擅佳名。水兼汴泗浮天濶。山
入青齊煥眼明。喬木下泉餘故國。黃鸝白鳥解人情。須知
壯士多秋思。不露文章世已驚。

遊鶴山院

積石橫成嶺。行楊密映門。人聲隱林杪。僧舍遠雲根。頓攝
塵緣盡。方知象教尊。只應羊叔子。名字與山存。
南豐先生
出守日常
游是院

和南豐先生西遊之作

孤雲秀壁共崔嵬。倚壁看雲足懶回。睡眼賸緣寒綠洗。醉
頭強爲好峰擡。山僧煮茗留寬坐。寺板題名卜再來。有愧
野人能自在。塵樊束縛久低徊。

和南豐先生出山之作

側徑籃舁兩眼明。出山猶帶骨毛清。白雲笑我還多事。流水隨人合有情。不及鳥飛潭自在。美他僧住便平生。未能與世全無意。起爲蒼生試一鳴。

和張次道再遊翠巖之作

去歲尋山有舊題。重來似與故人期。回巒俯仰如迎客。流水喧鳴擬索詩。嶺路依危通鳥過。吾身趨健白雲隨。自憐久快屠門嚼。欲住安能久茹芝。

和富中容朝散值雨感懷

節物驚心懶復嗟。樽中酒盡復誰賒。風撩雨脚俄成陣。雪閣雲頭欲結花。萬里可堪長作客。一年將盡未還家。自憐落落終難合。白首詩書謾五車。

謝贊閣黎見訪

好在談經老上人。衝風踏雪到江濱。百篇出篋自新得。一鉢隨身依舊貧。終歲杜門逃俗士。爲師設榻對修筠。蒲團藜杖焚香坐。此意此時無點塵。

和沈世卿推官見寄

倦看世態久低徊。且置窮通近酒杯。未忍一身閑處着。暫容雙眼醉時開。爲呼阿武扶頭起。擬與山公倒載回。好在東籬舊時菊。無心準擬白衣來。

和王明之見寄

末路相逢首重回。紫芝眉宇向人開。老來惟有風情在。事去空憐歲月催。憔悴不堪臨楚澤。棲遲無路上燕臺。少陵肺病疎杯斝。想負花前載酒來。

和酬施和叟宣德

山陰傾蓋兩綢繆。十載重來鬢已秋。往事侵尋如昨日。故人牢落半滄洲。流離道路生涯拙。蕪沒田園歲計休。久要尚憐君子在。爲言雞黍亦遲留。

送澤之過維揚

夢裏揚州十載聞。青樓陳迹故依然。袍爭爛錦催詩筆。雨濺明珠落酒船。顧我老無騎鶴興。羨君行及看花天。囊中繡句歸應滿。不負韋郎五色牋。

再到錢塘呈會宗伯益

負笈重來感舊遊。流年衰髯兩經秋。湖山依舊渾相識。風月愁人不自由。尚有故交重冷榻。不堪歸夢到滄洲。誰憐壯志空凋落。百鍊今爲遶指柔。

簡李伯益

蠶鹽度歲每無餘。垂橐東歸口未餬。貧裏交遊新斷絕。老來光景半消除。時情視我門前雀。人好看君屋上烏。尚喜敝廬連蔣徑。願求佳句逋髯奴。

九日無酒書呈漕使韓伯脩大夫

老大悲傷節物催。酒腸枯涸壯心灰。慙無白水真人分。難置青州從事來。倦筆懶從都市出。醉眸剛爲麪車回。黃花也似相欺得。坐對空樽不肯開。

過杭留別曹無逸朝奉

陳蕃解榻爲留連。俯仰徒驚歲月遷。故意斯人奈風雨。多情於我獨山川。可憐顏貌非前日。依舊窮愁似去年。後夜相思隔煙水。夢魂空寄過江船。

別威德寺

三宿城隍寺。輕齋類老禪。暫來真偶爾。適去更翛然。笑別留春塲。行尋下瀨船。此身猶斷梗。飄泊且隨緣。

沈道院有水墨壁畫奇筆也。惜其窮年無買之者。賈明叔請余同賦。

壁間水墨畫。為爾拂塵埃。草樹精神出。溪山氣勢回。路從沙嘴斷。人自渡頭來。莫怪知音少。牙絃匣不開。

和彥詹題遠軒

開窓得遠意。興出杳冥間。芳草日邊路。片雲天外山。好花和露斲。脩竹夾藤刪。每許南鄰伴。時來一寄顏。

夜坐有懷

一作秋懷

瑣瑣重門閉。蕭蕭一再更。一作稍稍昏烟短檠昏細字。高

枕笑忘一作平生來鴈防身早。一作秋秋陽換眼明。已須甘

酒力不用占時名。

一作

官鄰里舊心肯向人傾

馬上口占呈立之

廉纖小雨濕黃昏。十里塵泥不受辛。轉就鄰家借油蓋。始知公是最閑人。

